

李文恭公遺集

李文恭公奏議卷十八目錄

湘陰李星沅石梧著

男榛編次

梳

江督

揀員請調南匯縣知縣摺子

揀員請調江甯縣知縣摺子

場屬二麥收成分數摺子

附奏運銅人員借銀接濟片子

夏季輪閱江防礮隄情形摺子

附奏覆陳查訪南河情形片子

揀員升署東海營都司摺子

特參水師游擊吳聯魁摺子

審擬續獲糾搶各犯摺子

審辦結捻匪徒摺子

查報駱馬湖租錢文動存實數摺子

附奏委護徐州鎮總兵片子

附奏懇請對調總兵片子

附奏湖水驟長啟放各壩片子

附奏提督病痊銷假片子

附奏上海新到喚咭喇公使片子

委署藩司巡道摺子

升任游擊展限引

見摺子

酌籌外海水師章程摺子

籌捐添造外海水師戰船摺子

附奏積水漫溢圩岸兵船被風損傷片子

附奏江湖海同時並漲卽行馳詣清江會籌辦理

片子

揀員請補淮安府知府摺子

兩淮場竈被水較重現籌撫卹摺子

勒休池州營都司王全德摺子

附奏委署華亭縣知縣片子

附奏提審京控咨交案件片子

附奏捐廉辦賑片子

查看水勢馳抵清江面晤河臣商推卽回省城督

辦勘災勸捐事宜摺子

沛縣民堰埽壩各工修築完竣摺子

俄囉嘶國商船請在上海貿易已飭立限回帆摺子

附奏調署上元縣知縣片子

附奏縷陳辦賑情形片子

揀員調補上元縣知縣摺子

敬陳愧悚下忱摺子

臚陳江湖積漲情形並回署日期摺子

附奏運鉛人員請借讓漕銀兩片子

附奏秋季輪閘礙隄請俟水涸演閘片子

拏辦山東逸犯摺子

哦囉嘶商已由吳淞口放洋摺子

籌撥幫丁行月等米摺子

附奏運鉛人員請借銀兩片子

保送堪勝水師總兵人員摺子

議請將捕盜水勇挑補弁兵摺子

附奏淮商捐穀助賑片子

附奏覆陳夷商貿易情形片子

甄別知縣摺子

奏謝兼署南河總督摺子

揀員請升蘇松鎮標左營游擊摺子



酌議移駐江陰官兵摺子

附奏辦漕交涉弊端毋須聯銜具奏片子

恭報兼署南河總督日期並陳河工情形摺子

升任道員現署藩司擬請暫緩交卸摺子

揀員請升掘港營都司摺子

附奏借款購備河工歲料片子

奏報霜降安瀾摺子

附奏請

加封風神片子

揀員請調南匯縣知縣摺子

奏爲揀員請調沿海要缺知縣恭摺奏祈

聖鑒事竊照准調南匯縣知縣孫琬因病出缺業經恭  
疏

題報在案所遺南匯縣知縣係繁疲難兼三要缺例  
應在外揀調該縣外臨大海內通黃浦凡吳淞口  
貿易商船均在該縣所管南匯頭洋面往來實爲  
江蘇內洋鎖鑰政務亦極殷繁非精明幹練之員

弗克勝任臣等於通省現任知縣內逐加遴選查  
有上元縣知縣李映棻年三十五歲四川進士卽  
用知縣簽掣江蘇

奏補今職道光二十六年正月二十六日先行任事  
三月二十三日奉文准補於捐辦米石案內奉部  
議給知州銜該員年壯才優勤明穩練以之調補  
南匯縣知縣洵堪勝任惟歷俸未滿三年且以繁  
調繁與例稍有未符第南匯縣係沿海要缺人地

實在相需合無仰懇

天恩俯准以上元縣知縣李映葵調補南匯縣知縣於  
海疆要缺洵有神益如蒙

俞允該員係現任知縣請調知縣銜缺相當毋庸送部  
引

見其任內一切因公處分例免核計仍飭將初次請調  
應完罰俸銀兩依限完繳清楚另行造冊咨銷所  
遺上元縣知縣容俟部覆知照截缺再行遴員請

調據江蘇藩臬三司會詳前來謹循例合詞恭摺  
具

奏伏乞

皇上聖鑒訓示謹

奏 道光二十八年五月二十七日具

奏奉

硃批吏部議奏欽此

揀員請調江甯縣知縣摺子

奏爲揀員請調省會要缺知縣恭摺奏祈

聖鑒事竊照江甯縣知縣范仕義人地未宜撤回另補  
業經奏奉

諭旨允准在案所遺江甯縣知縣係衝繁難兼三要缺  
例應在外揀選調補該縣係省會首邑時有發審  
案件政務殷繁必得精明強幹之員始足以資治  
理臣等於通省知縣內逐加遴選非現居要缺卽

人地未宜惟查有沭陽縣知縣方傳書年三十九歲安徽監生遵例報捐兵馬司正指揮補授中城兵馬司正指揮捐輸經費奉

旨以知縣選用欽此選授今職道光二十五年八月到任該員年力富強才具明敏現署江甯縣事辦理裕如以之調補江甯縣知縣實堪勝任雖歷俸未滿三年與例稍有未符第人地實在相需合無仰

懇



天恩俯念員缺緊要准以沭陽縣知縣方傳書調補江甯縣知縣實於省會要缺有裨如蒙

俞允該員以現任知縣調補知縣銜缺相當毋庸送部

引

見其任內一切因公處分遵例毋庸核計仍飭將初次請調應完罰俸銀兩呈繳清楚另行造冊咨銷所遺沭陽縣知縣江蘇現有應補人員容俟奉到部文截缺知照再行遴員請補據藩臬兩司會詳前

來謹循例合詞恭摺具

奏伏乞

皇上聖鑒訓示謹

奏 道光二十八年五月二十七日具

奏奉

硃批另有旨欽此內閣奉

上諭李星沅等奏揀員請調省會要缺知縣一摺著照所請江蘇江甯縣知縣員缺准其以方傳書調補該

部知道欽此

李文恭公奏議

卷十八 江省

五

場屬二麥收成分數摺子

奏爲循例恭報場屬二麥收成分數仰祈

聖鑒事竊照兩淮通州泰州海州三分司所屬各場二麥收成分數例應

奏報茲屆二麥登場據署通州分司運判陳兆齡稟報所屬豐利等九場率算收成約計六分有餘又據泰州分司運判許惇詩詳報所屬富安等十一場率算收成約計五分有餘又據海州分司運判

洪上庠稟報所屬板浦等三場牽算收成六分有餘臣查通泰兩屬各場地勢高下不等燥濕異宜本年二三月間陰雨較多凝陰日久以致麥苗長發未能一律暢茂至海屬各場專以曬掃爲業所有池頭灘角不成頃畝種麥亦稀是以收成均止中稔據鹽運使但明倫彙覈請

奏前來理合將二麥收成分數循例恭摺具

奏伏乞

皇上聖鑒謹

奏 道光二十八年五月二十七日具

奏奉

硃批知道了欽此

附奏運銅人員借銀接濟片子

再前准部咨運銅人員實因守風阻水以致運費不敷必須借銀接濟者委員查實

奏明借給將借過銀數知照下游省分總不得逾八百兩之數茲有雲南領解丁未年正運二起京銅委員署宜良縣事試用通判盛熙瑞因沿途風水耽延致將原領水腳銀兩用盡曾經湖北撫臣借給銀三百兩

一奏明咨照在案現抵江甯一入內河起剥僱緯需用  
力難措辦稟請借給養廉銀五百兩由江甯布政  
使傅繩勛飭委江甯縣查實詳請循案借給前來  
臣查該員盛熙瑞稟請找借銀數核與舊章相符  
除飭司在於司庫蘆課款內借給銀五百兩催令  
趲運前進竝咨滇省於該員應領項下扣還造報  
江省作正開銷暨分咨山東直隸知照外理合附  
陳伏乞



聖鑒謹

奏

硃批該部知道欽此

夏季輪閱江防礮堤情形摺子

奏爲夏季輪閱江防礮堤恭摺奏祈

聖鑒事竊照大江南北兩岸礮堤各礮兵遵

旨按季輪演茲屆夏季演閱之期臣會同將軍臣裕瑞

於五月十一日前往五龍山沙洲圩兩處礮堤校

閱滿漢官兵施放礮位其餘沿江各堤兵礮查照

定章輪應署提督臣來英閱視於五月初六日自

松江起程初十日行抵鎮江查閱北固山象山順

江洲上下各礮堤十一日查閱圖山關大礮頭二  
礮頭東生洲固土洲西成洲礮堤十六日查閱鷺  
鼻嘴大小石灣劉聞沙礮堤以上十四處所築土  
檔土墩均屬修理堅固礮蓋木罩油艫結實礮門  
礮口竝無銹蝕礮子俱各合膛適用滿漢官兵演  
放大礮每位二出裝藥點火極爲便捷膽壯護礮  
及後路接應兵丁施放連環槍礮聲勢亦均聯絡  
實無應劾之處當經分別獎賞以示鼓勵竝諭各

官兵認真習練精益求精勿稍鬆懈謹將本年夏季閱演沿江礮堤兵礮情形會同江甯將軍臣裕瑞署江南提督臣來英合詞具

奏伏乞

皇上聖鑒謹

奏 道光二十八年五月二十七日具

奏奉

硃批知道了欽此

附奏覆陳查訪南河情形片子

再臣接閱邸鈔南河督臣潘錫恩奏請添撥銀兩

一摺由戶部議准奏奉

上諭嗣後該河督務當認真稽察舉劾兼施遇有往謁  
求助之人卽將其人指名嚴參并著兩江總督明查  
暗訪立杜弊源等因欽此伏讀

天語煌煌訓誡嚴切凡有人心咸知欽悚臣查清江爲  
南北要道往來官紳人等間或希圖沾丐藉助旅

資在所不免誠河工積弊之一端然使河員辨工果能潔已盡心力圖節省焉有餘財分潤是他人之因以爲利未始不因河員之自利也向來例撥銀兩各廳視爲故常歲以搶險爲詞添設墊辦名目爲數甚鉅偶值水勢增長仍請另備急需

國家大計攸關河臣不能不奏撥部臣不能不議准其孰平孰險爲公爲私幾至不可窮究縱非意存恐嚇未必悉矢天良責以工程保固殊難盡信且

各廳領款雖多庫貯實少幕友丁胥耗之差委營  
汎耗之攤派酬應耗之酒食游戲驕奢淫佚又耗  
之惡習相沿牢不可破彌縫秘密指摘無憑就使  
欽派大臣勘工點料若輩巧詐百出敷衍一時或指東  
畫西或那前掩後非夙知底裏何能立發其奸甚  
至徒煩供億故欲力杜弊源亦惟於河督專責而  
已現在河臣潘錫恩閱歷最深機宜最熟銳以河  
事自任臣職司兼轄深恨未悉河防祇於用人一

節以猛濟之前經

奏參文武各員亟思去其太甚而在工候補自問不  
安者頗多告病告養以去風氣略爲儆動臣任怨  
河臣任勞彼此推誠無間潘錫恩雖因病後精力  
微遜於前而籌慮經營實未嘗一息稍懈第其責  
任極重且夕設有不及接替必資熟手仰惟

聖主知人雍容默簡自握先事儲材之要臣仍與河臣

潘錫恩隨時認真考劾凜遵



諭旨於往來求助之人明查暗訪據實嚴參以重要工  
而祛積習謹附片密陳伏乞

聖鑒爾中謹

奏

爾中

揀員升署東海營都司摺子

奏爲揀員升署內河水師都司恭摺奏祈

聖鑒事竊照准升東海營都司趙長庚於未經引

見之先以服制循例退回守備原任俟服滿後再行升

轉所有東海營都司員缺接准部咨應用應題人

員當卽照例揀選題補惟查東海營都司駐劄海

州雲臺山地方係屬內河水師所轄洋面與山東

連界向多盜梟出没非精明強幹緝捕得力之員

弗克勝任臣於內河水師守備內詳加遴選雖有合例人員而熟悉情形勤於緝捕者實難其選該員趙長庚年五十歲江蘇丹徒縣人由武生捐納營千總洊升鹽城營守備道光二十五年六月內接劄實授經前督臣璧昌題升是缺先行到任奉部覆准尙未引

見據報丁憂適當整飭洋面海運喫緊之時經臣飭令暫緩交卸旋據拏獲迭劫拒捕洋盜金三等十四

名竝委令挑選水兵馳赴山東交界石島洋面迎  
護海運米船該員年強技可辦事實心勞瘁不辭  
勤奮無誤洵爲內河水師守備中出色之員仍以  
之請升都司可期勝任惟該員現有親喪與例稍  
有未符溯查從前內河守備李洲劉錫溫均於服  
制期內

奏准升署都司歷有成案可循臣因人地相需起見  
合無仰懇

聖恩俯准仍以趙長庚升署東海營都司於營伍地方  
均有裨益如蒙

俞允俟服闋後再行給咨送部引

見另請實授除飭取履歷咨部外臣謹會同漕運總督  
臣楊以增合詞恭摺具

奏伏乞

皇上聖鑒訓示謹

奏 道光二十八年六月十一日具

奏奉

硃批兵部議奏欽此

特參水師遊擊吳聯魁摺子

奏爲特參庸懦無能之水師遊擊請

旨革職恭摺奏祈

聖鑒事竊照蘇松鎮標左營遊擊吳聯魁前於署川沙  
營參將任內緝捕懈弛經前督臣壁昌奏奉

諭旨摘頂勒緝臣到任後復責令隨同署蘇松鎮總兵  
田浩然出洋捕盜方期稍知愧奮戴罪圖功乃該  
遊擊於前此疏防馮寶山等案賊盜日久迄無一

獲卽本年二月二十三日隨同署參將劉長清等  
攻擊盜船亦止從旁助勢每遇巡緝洋面防護海  
舶均不能奮勇向前勉圖自效實屬庸懦無能當  
水師喫緊之時首在將官得力豈可因循積習再  
事姑容據田浩然以該遊擊質本軟弱不堪造就  
稟請參辦前來相應請

旨將蘇松鎮標左營遊擊吳聯魁卽行革職以肅營伍  
而儆怠玩臣謹會同署江南提督臣來英恭摺具



奏伏乞

皇上聖鑒訓示謹

奏 道光二十八年六月十一日具

奏奉

硃批另有旨欽此內閣奉

上諭李星沅奏參庸懦無能之水師遊擊一摺江南蘇  
松鎮標左營遊擊吳聯魁前因疏防盜案擄去頂帶  
勒限緝犯日久迄無弋獲經該督責令隨同出洋捕

盜復不能奮勇向前勉圖自效實屬庸懦無能不堪  
造就吳聯魁著卽行革職以爲緝捕廢弛者戒該部  
知道欽此

審擬續獲糾搶各犯摺子

奏爲續獲糾搶案犯審明定擬恭摺奏祈

聖鑒事竊照事主彭祖賢於道光二十五年四月初三日在宿遷縣順河集地方被搶一案欽奉

諭旨嚴拏無獲當經前督臣壁昌前署撫臣陳繼昌奏奉

上諭現署徐州府知府劉澇撤任宿遷縣知縣易卓梅典史高兆祥署把總汪駿均革職留緝等因欽此旋

據緝獲搶犯魏麻仔竝臨時患病不行之劉得人  
劉老實李三猛等共四名問擬流徒將魏麻仔一  
犯聲請監候待質恭摺會

奏奉准部覆在案茲據參革留緝之前任宿遷縣知  
縣易卓梅等會同甘泉縣知縣徐德元於二十八  
年正月十五日拏獲逸犯張麻仔杜跑二名押解  
來省委據江甯府訊出首犯蘇大漢於二十七年  
九月十一日在宿遷縣西門渡黃覆舟淹斃行據

宿遷縣查明是日有渡船戶丁小連裝載十一人  
渡黃因風覆舟溺斃三人稟報有案覆訊丁小連  
據供伊與蘇大漢並不認識是否溺斃在內不能  
確指屍身因水勢深溜無從打撈提同監候待質  
之魏麻仔由江甯布政使傅繩勛督同江甯府知  
府徐青照審明擬解前來臣李星沅親提研鞫緣  
張麻仔杜跑均籍隸山東嶧縣拉絳度日素未爲  
匪犯案道光二十五年四月初三日張麻仔杜跑

在宿遷縣順河集與蘇大漢及前獲待質之魏麻  
仔會遇者道貧難蘇大漢起意搶奪張麻仔等允  
從又糾已獲擬結之劉得人劉老實李三猛入夥  
是夜三更共夥七人各攜刀棍絳板走至半路劉  
得人陡患腹痛不能行走劉老實李三猛扶送轉  
回張麻仔杜跑蘇大漢魏麻仔四人行至離順河  
集五里許堤上見有事主彭祖賢車輛經過蘇大  
漢等各持器械上前攔住吹滅車上燈籠搶得衣

包木匣事主家人袁升喊拏張麻仔起意拒捕用木棍毆打袁升一下未經成傷魏麻仔用刀割斷衣包捆繩取出銀兩逃至僻處俵分花用事主報縣會營勘訊估贓通詳欽遵

諭旨嚴飭拏獲夥犯魏麻仔等分別審擬

奏結茲據會獲張麻仔杜跑到案究出首犯蘇大漢渡河覆舟溺斃按擬詳解臣李星沅親提嚴詰衆供不移案無遁飾查例載搶奪財物雖不滿十人

但經執持器械倚強肆掠者照糧船水手例分別  
首從定擬又糧船水手夥衆十人以上執持器械  
搶奪爲首照強盜律治罪爲從減一等又搶奪拒  
捕未經成傷之首犯發近邊充軍各等語此案張  
麻仔聽從蘇大漢執持器械攔截車輛搶奪財物  
復用木棍拒毆事主家人未經成傷自應從重問  
擬張麻仔除持械搶奪爲從罪止滿流輕罪不議  
外合依搶奪拒捕未經成傷之首犯例發近邊充



軍杜跑聽糾同搶應依搶奪不滿十人但經執持  
器械倚強肆掠照糧船水手執持器械搶奪爲首  
照強盜律治罪爲從減一等例於強盜已行得財  
斬罪上減一等杖一百流三千里事犯雖在道光  
二十五年五月二十四日清刑

恩旨以前犯係搶奪不准援減魏麻仔聽糾同搶前因  
旁無實証監候待質今續獲張麻仔等僉稱係蘇  
大漢起意且據供眼見蘇大漢渡河溺斃情詞確

鑿竝無避就魏麻仔應照原擬杖一百流三千里  
與張麻仔等均面刺搶奪二字分別定地起解到  
配折責安置再此案於道光二十五年四月初三  
日失事連閩扣至二十八年七月初三日四參限  
滿首夥七人內劉得人等三名臨時患病不行實  
在行搶者蘇大漢等四犯於疏防限內經鄰境捕  
獲搶犯魏麻仔一名又同謀不同行之劉得人等  
三名現於四參限內經該革員易卓梅等自行拏

獲拒捕搶犯張麻仔杜跑二名先後共獲六名其  
首犯蘇大漢據供渡河淹斃行查年月日期相符  
案無餘犯所有原參革職留緝之宿遷縣知縣易  
卓榜典史高兆祥署把總汪駿應否開復原官免  
其留緝首犯蘇大漢屍身未獲仍照盜首未獲例  
議處之處聽候部議協獲軍流人犯二名職名係  
甘泉縣知縣徐德元除錄供咨部外謹會同江南  
河道總督臣潘錫恩合詞恭摺具

奏伏乞

皇上聖鑒敕部核覆施行謹

奏 道光二十八年六月十一日具

奏奉

硃批刑部議奏欽此

審辦結擒匪徒摺子

奏爲拏獲結擒匪徒審明分別定擬卽將爲首兇犯

恭請

王命先行正法會摺奏祈

聖鑒事竊照睢甯縣匪徒張沅同等結擒訛擾擄人勒贖一案前經臣等以該縣僅止獲犯八名首犯未獲實屬拏辦不力

奏奉

諭旨署睢甯縣知縣賈鎮著暫行革職畱任勒限緝拏  
等因欽此旋據該縣續獲擒首劉大牙等九名押  
解來省尙有黃禿子一犯在銅山縣境拒捕格斃  
章學生一犯在籍病故委據江甯布政使傅繩勛  
督同江甯府知府徐青照審擬解勘前來臣李星  
沅親提研鞫緣劉大牙曹冠羣廉平王沅棟王汝  
溶李春淋時兆科張沅同章學任曹保王來安沈  
奎董庭標吳庭書孫克林孫灃曹敬業籍隸睢寧

等縣遊蕩度日道光二十七年七月劉大牙與廉平王沅棟王汝溶李春淋時兆科及監斃之張沅同章學任格斃之黃禿子病故之章學生在逃之李馬杜大幅史二賊共十三人遇道貧難劉大牙起意結捻訛人彼此幫助廉平等允從至八月間曹冠羣與曹保沈奎董庭標吳庭書孫克林孫灃王來安及監斃之曹敬業在逃之王三虎曹滄業李四石三亦十三人另結一捻與劉大牙等各不

相謀均聚散無常八月初六日劉大牙諭知睢甯  
縣民吳步雲家道殷實恣意擄捉勒贖得錢分用  
邀允張沅同章學任章學生黃禿子李馬共六人  
各帶刀棍火槍偕抵吳步雲家劉大牙喝令黃禿  
子將吳步雲七歲幼子吳和尚擄出吳和尚之母  
吳胡氏攔奪劉大牙用刀拒傷吳胡氏顛門左手  
大指併將衣服搶走吳步雲喊捕李馬放槍嚇退  
雇工徐洪聲追趕劉大牙將其一併擄至上樓地



方關禁勒錢三百千贖回二十一日李馬起意邀  
允劉大牙張沅同章學任章學生黃禿子杜大幅  
共七人將睢甯縣民趙均擄至高橋地方勒錢一  
百二十五千贖回二十二日李馬起意邀允劉大  
牙王汶溶李春淋時兆科史二賊共六人將睢甯  
縣民陳巨擄至花山地方勒錢五十千贖回二十  
五日劉大牙起意邀允王汶溶李春淋時兆科章  
學生李馬共六人將睢甯縣民莊思銓擄至碾莊

地方勒錢一百八十千贖回九月初四日章學生  
起意邀允劉大牙王沅棟廉平章學任張沅同黃  
禿子李馬杜大幅史二賊共十人各帶刀械齊抵  
睢甯縣民章小狗家張沅同杜大幅史二賊將章  
小狗擄出親族陳宗遙等追捕章學生劉大牙王  
沅棟廉平章學任黃禿子各用小刀轉身拒捕致  
傷陳宗遙右腿肚章彭瑞左手心右腿章學羣右  
腳踝腳跟王以榮左腿章彭萬左肩甲左胳膊左

手腕陳玉懷左右脰膊右脇肋陳殿郎穀道李馬  
點放火槍盡傷陳殿郎偏右額角右太陽穴右腮  
腴章小狗之外祖陳炳隨後追趕章學生將其一  
併擄至高橋地方勒錢四百五十千贖回此劉大  
牙一捻擄捉勒贖搶奪拒捕情形也八月二十六  
日曹冠羣起意邀允吳庭書孫克林孫灃曹保曹  
敬業共六人將睢甯縣民魏清彥擄至峯山地方  
勒錢八十五千贖回九月初六日曹冠羣起意邀

允曹保沈奎董庭標吳庭書孫克林孫雲王來安  
曹敬業王三虎曹澁業李四石三共十三人各帶  
刀械借至銅山縣民苗景文家曹敬業將苗景文  
擄捉同吳庭書等先行架走曹冠羣王三虎搶得  
衣物錢票逃出苗景文之弟苗景新邀同族鄰趙  
泳奇等幫同追捕趙泳奇將曹保擊獲揪按在地  
曹冠羣趕至趙泳奇身後用刀戳傷穀道趙泳奇  
鬆手倒地曹保起身用刀拒傷趙光右胳膊左肋

右腿肚董庭標用刀拒傷苗景新右腿肚沈奎用  
刀拒傷趙天詳臍肚追上曹敬業等將苗景文擄  
至蘇堂地方因兵役聞風查拏將苗景文放回未  
經凌虐勒贖趙泳奇旋即因傷殞命此曹冠羣一  
捻擄捉搶奪拒捕殺人情形也吳步雲等先後報  
縣會營勘緝獲犯張沅同等八名錄供通詳經臣  
等會摺奏參奉

旨將署睢甯縣知縣賈鎮暫行革職畱任勒限嚴緝卽

據續獲劉大牙等提省發審按擬詳解親提覆鞫  
據供前情不諱詰無凌虐別故案無遁飾查例載  
山東省匪徒如有結捻聚眾十人以上首犯擬絞  
監候爲從均發新疆酌撥種地當差又捉人勒贖  
之案止圖獲利關禁勒贖爲首發遣新疆給官兵  
爲奴爲從俱發極邊足四千里充軍如有聚眾拒  
殺兵役者首犯擬斬立決其傷人未死如刃傷首  
犯擬斬監候爲從發新疆給官兵爲奴又廣東省

捉人勒贖如被捉數在三人以上及擄捉已至三

次以上同時竝發罪應遣軍者加擬絞監候又廣

東省匪徒如有將十五歲以下幼童捉回勒贖罪

應斬絞監候者加擬立決各等語此案劉大牙起

意結捻聚眾十三人爲首擄搶拒捕二次爲從擄

贖拒捕三次共擄捉七人內惟糾擄年甫七歲之

吳和尚等搶奪財物拒捕刃傷事主吳胡氏平復

一案情節最爲兇惡查擄贖拒捕刃傷兵役爲首

罪應斬候其刃傷事主與刃傷兵役無異應從重  
比例問擬劉大牙應請比照廣東省匪徒如有將  
十五歲以下幼童捉回勒贖罪應斬候者加擬立  
決例擬斬立決曹冠羣起意結捻聚眾十三人糾  
捉魏清彥苗景文竝搶奪財物二次拒傷趙泳奇  
身死查趙泳奇係苗景新邀往幫捕卽與應捕之  
兵役無異自應按例問擬曹冠羣合依捉人勒贖  
如聚眾拒殺兵役者首犯斬立決例擬斬立決該



二犯均屬著名捻首膽敢白晝聚衆執持火槍刀  
械糾擄幼孩搶奪財物殺傷追捕之人迥非尋常  
擄贖可比徐州民俗强悍界連豫東安徽三省向  
爲捻匪出沒之區擄贖橫行愍不畏法若非從嚴  
懲劓無以儆彼兇頑臣未敢稍事拘泥卽於審明  
後恭請

王命飭委藩司傅繩勛督標中軍副將松安將劉大牙  
曹冠羣二犯綁赴市曹先行正法傳首犯事地方

懸竿示衆以昭炯戒章學任聽從入擒擄贖拒捕  
刃傷捕人平復罪應擬遣張沅同聽從入擒擄贖  
竝未拒捕罪應擬軍惟已擄捉至三次五人章學  
任張沅同均請從重比照廣東省捉人勒贖至三  
次以上罪應遣軍者加擬絞監候例擬絞監候王  
沅棟廉平沈奎董庭標聽從入擒擄捉一次曹保  
聽從入擒擄捉二次俱曾隨同拒捕刃傷捕人平  
復王沅棟廉平沈奎董庭標曹保五犯均請照捉

人勒贖拒捕傷人未死刃傷爲從例發新疆給官  
兵爲奴王汝溶李春淋時兆科吳庭書孫克林孫  
湮曹敬業聽從入捻擄捉二次王來安聽從入捻  
擄捉一次均無拒捕凌虐情事除擄人勒贖罪止  
擬軍不議外應請從重比照山東省匪徒結捻聚  
至十人以上爲從例發新疆酌撥種地當差沈奎  
等據供親老丁單係捻匪生事均毋庸查辦畱養  
章學任張沅同在睢甯縣曹敬業在銅山縣各監

病故章學生在籍病故黃禿子在銅山縣拒捕被  
差格殺經地方官驗訊明確竝無凌虐別故事主  
吳胡氏等被拒各傷俱已平復均毋庸議勒贖錢  
文及搶奪贓物照追給領刀械供棄免追屍棺飭  
埋逸犯李馬等緝獲另結此案劉大牙曹冠羣起  
意結捻爲匪同夥二十六人署睢甯縣知縣賈鎮  
先於疏防限內拏獲張沅同等八犯嗣於被參後  
又獲擒首劉大牙曹冠羣等九名竝格殺一名病

故一名僅止未獲夥犯七名尙知愧奮合無仰懇  
聖恩將署睢甯縣知縣賈鎮開復革職畱任以觀後效  
除備錄全案供招咨部外謹合詞恭摺具

奏伏乞

皇上聖鑒敕部核覆施行謹

奏  
道光二十八年六月二十四日具  
奏奉

硃批該部議奏欽此

查報駱馬湖租錢文動存實數摺子

奏爲查報道光十九年至二十五年應徵宿遷縣駱馬湖租錢文動存實數恭摺奏祈

聖鑒事竊照宿遷縣駱馬湖無糧灘地經前督臣孫玉

庭前河臣黎世序委員文明頃畝酌定租息

奏奉

諭旨自道光三年爲始於麥熟後徵收撥充淮徐兩府地方公用仍將動存實數於年底奏報一次免其逐

案報銷等因欽此所有道光十八年以前徵收動用各數業經分年

奏報在案道光十九年以後延未詳奏節經嚴劄飭催茲據江甯布政使傅繩勛等將道光十九年起至二十五年徵存動支各數詳請併案具

奏前來臣等伏查該湖灘地自道光十九年至二十五年應徵租息核數相符其動支各款亦係實用實銷尙無浮冒惟案應按年報銷該府縣積壓數

年始行詳辦若再分年

奏報徒滋繁瀆謹將各年徵存動支各數敬繕清單

恭呈

御覽仍飭取造報遲延職名咨部議處以戒玩延嗣後  
仍遵前奉

諭旨按年奏報不得援以爲例其各年民欠亦飭該司  
道查明完欠數目分別追繳理合會同江蘇撫

臣

陸建瀛合詞恭摺具



奏伏乞

皇上聖鑒謹

奏 道光二十八年六月二十四日具

奏奉

硃批戶部知道欽此

委護徐州鎮總兵摺子

奏爲委護總兵印務恭摺奏祈

聖鑒事竊准部咨欽奉

上諭四川重慶鎮總兵員缺著王鵬飛補授等因欽此

除恭錄轉行欽遵外臣查王鵬飛前經

奏請委署徐州鎮總兵今蒙

簡放四川重慶鎮總兵所有徐州鎮總兵員缺應卽另

行委員接署以便王鵬飛交卸起程徐州風氣剽

悍界連豫東安徽三省素爲匪徒出沒之區每屆夏秋稻梁茂密尤易潛蹤伺劫全賴總兵督飭所屬各營周歷巡查庶幾地方安謐查有准升安慶協副將恩長廉明勇敢妥實精詳堪以暫行護理除檄飭遵照外謹繕摺具

奏伏乞

皇上聖鑒謹

奏 道光二十八年六月二十四日具

奏奉

硃批知道了欽此

附奏懇請對調總兵片子

再江南狼山鎮總兵駐劄江北通州地方爲江海  
交匯之區所轄六營內有狼山右營掘港營係外  
海水師又狼山中左二營係內河水師其泰州泰  
興二營雖係陸路亦皆沿江是該鎮名爲陸路總  
兵而其職任實偏重於水師現任總兵臬陞曾經  
出師打仗自道光二十三年三月到任以來端潔  
嚴明實心任事陸路營伍頗資整飭惟於外海內

江之風雲沙線及船務戢駛趨避究不能指示機  
宜似屬舍長用短新任四川重慶鎮總兵王鵬飛  
自道光八年選用江省歷任佃湖柘林都司金山  
泰州游擊海州參將均係沿江沿海之區熟悉情  
形畱心水務詢以水師利弊人材賢否俱能瞭如  
指掌竊思量材器使

宸衷自有權衡非臣下所敢干請而因時因地實有所  
見亦不敢不陳於

聖主之前可否仰懇

天恩俯念江省水師正當喫緊之際將皂陞王鵬飛二

員互相調補俾得各展所長臣謹附片密陳伏乞

聖鑒訓示謹

奏

留中

附奏湖水驟長啓放各壩片子

再本年洪澤湖水勢增長早而且驟節經河戶潘  
錫恩往返函商會飭道廳將高家堰仁禮智信等  
河壩先後啟放全湖之水建瓴下注又因江潮頂  
托宣洩不暢高寶湖勢不能容兼值風雨頻仍運  
堤十分喫重必啟車邏等壩洩水歸海而下河各  
州縣僉以周圍千餘里農田數十萬頃正值揚花  
吐秀之時稟請暫緩啟壩並據各州縣紳民來省



具呈籲求懇切

臣

當以堤工農業均關

國計民生自當得守且守必不得已則兩害相較取其輕斷不可稍存固執致誤大局飛飭署淮揚道周燾揚州府知府吳葆晉親詣高郵督飭州縣廳營相度機宜妥爲辦理河

臣

潘錫恩亦因高郵河水久逾定誌飭委河標中軍副將許聯鑑河營參將呂邦治千總周立成持令前往擬十七日先啟車邏壩維時附近農民數千猶復爭護壩所力與

弁兵相持經高郵州知州范鳳諧彈壓解散臣於  
得信後卽擬親詣查辦正束裝間接據稟報署淮  
揚道周燾與興化東臺等縣知縣先後踵至向該  
民人剴切曉示利害始各散去遂於二十日申時  
啟放車邏壩二十一日午時啟放南關新壩過水  
暢溜民情安謐臣可無庸親往惟下河旣已啟壩  
誠恐水勢散漫民田不無被淹尤當先其所急一  
面委員迅速分投履勘應否酌量撫卹會同撫臣

督飭藩運兩司上緊分別籌辦以抒民困容再查  
明核實具

奏謹將高寶一帶開壩洩水情形先行附片陳明伏  
乞

聖鑒謹

奏

硃批知道了欽此

附奏提督病痊銷假片子

再江南提督臣尤渤前因病後步履維艱精力未能充足經臣

奏蒙

聖恩兩次賞假調理茲據該提督函稱病已痊愈因上年冬間卽應遵

旨赴都

陛見現擬自行具摺奏請銷假入

李文恭公奏議

卷十一

江督

四十一

覲迎摺北上等語臣謹附片陳明伏乞

聖鑒謹

奏

硃批另有旨欽此內閣奉

上諭李星沅奏提督病痊等語覽奏欣慰江南提督尤  
渤辦事認真操防得力朕所素知毋庸來京陛見免  
得徒勞往返尤渤著卽行接印任事欽此

附奏上海新到喚吉利公使片子

再據署蘇松太道吳健彰等先後稟報六月初七日有喚吉利火輪船一隻駛至上海探係該國新到公使船隻卽據領事阿利國帶同該公使咬咬副理官噴啞並繙譯官一名前來道署詢悉五月二十日由廣東香港至廈門甯波一路查看五口貿易情形並稱該商等在上海生理深蒙保護特來拜謝等語情詞極爲恭順體察亦無他意卽於

初九日仍坐原船出口駛赴浙江洋面而去居民  
皆不驚疑等情臣查兩廣督臣徐廣縉先後函稱  
該國新換公使係名叻翰曾在虎門接見近復接  
准照會將赴通商各口察看等語今來上海公使  
係名叻叻似由字音傳說之訛謹附片陳明伏乞

聖鑒謹

奏

硃批知道了欽此

委署藩司巡道摺子

奏爲遴員遞署藩司巡道篆務恭摺奏祈

聖鑒事竊臣等接准部咨光緒二十八年六月二十六

日奉

上諭浙江巡撫著傅繩勛補授馮德馨著補授江甯布政使等因欽此又奉六月二十八日

上諭江西巡撫著傅繩勛補授等因欽此當經恭錄行知查馮德馨到任尙需時日所遺江甯藩司篆務



查有江甯鹽巡道積喇明阿爲守俱優老成幹練  
歷署藩臬各篆辦理裕如堪以委令就近接署以  
便傳繩助交卸起程其江甯鹽巡道缺事務較簡  
查有江甯府知府徐青照精明樸實守潔才長堪  
以委令兼護除分飭遵照外謹合詞恭摺具

奏伏乞

皇上聖鑒謹

奏 道光二十八年七月十一日具

奏奉

硃批知道了欽此

李文恭公奏議

卷八

江督

五

升任遊擊展限引

見摺子

奏爲請升外海水師遊擊輪巡外洋未能依限引

見恭摺奏祈

聖鑒事竊准兵部咨掘港營都司陳施華准其升署福山鎮標左營遊擊應令給咨赴部引

見等因查陳施華先經委署狼山鎮標右營遊擊輪巡外洋現值整飭水務兜捕洋盜喫緊之際一時未

卽歲事奉任遊擊黃登第又經委令駐劄奈山洋  
尚未便進行更調致滋貽誤所有陳施華應行引  
見之處相應照例請

旨展限并請

飭部先給署劄開其處缺俟補滿再行給咨赴部  
引

見理合恭摺具

奏伏乞

皇上聖鑒訓示謹

奏 道光二十八年七月十一日具

奏奉

硃批兵部知道欽此

酌籌外海水師章程摺子

奏爲酌籌整飭外海水師章程恭摺奏祈

聖鑒事竊臣等前因江蘇水師廢弛洋面盜劫頻聞臚列情形據實陳奏欽奉

上諭著沿海各督撫各飭水師將弁不分畛域認真兜截不得稍畱餘孽至該督等奏稱水師廢弛原設營制未能盡善現在整頓水師嚴緝洋盜另議章程務當通盤籌畫於連界分捕合捕之處悉心妥議總期

責有攸歸漸著成效等因欽此

臣

等伏查水師出洋

首重船隻江蘇外海九營所轄洋面遼濶向止舩

船十二隻

臣

等先務爲急現議勸諭紳商捐造添

補應用另摺具

奏惟船備而鎮將不力弊仍與無船等而鎮將之所

以得力又在湔除積習鼓舞新機當因者因當革

者革調度因需臨事巡緝亟應預籌

臣

等體察情

形悉心妥議謹擬言之必可行者約舉數端敬爲

我

皇上陳之一人宜磨厲也江蘇風氣柔弱水師尤難  
得人近年洋盜未清從不聞兵船在洋接仗之事  
經臣等疊次指參庸劣不堪之鎮將分別革職枷  
號並派文職大員督辦各營始知儆畏勉力出洋  
而昏暈嘔吐無狀不備又經汰其已甚獎其稍可  
革除陸兵名目專從水務取材數月以來略有起  
色如署參將劉長清遊擊黃登第等先後擊沉盜



船擒獲盜犯救回被劫商船皆近來所未有惟全  
材甚不易得要必舍短取長明定賞罰優者破格  
示獎劣者加等示懲駕馭而鞭策之令其知感知  
奮一營巡宜變通也蘇松福山兩鎮同爲外海水  
師而蘇松鎮常年統巡外洋秋冬兼巡內洋福山  
鎮僅止春夏統巡內洋秋季會哨一次未免勞逸  
懸殊應從道光二十九年正月爲始蘇松鎮春秋  
統巡外洋夏冬統巡內洋福山鎮夏冬統巡外洋

春秋統巡內洋狼山鎮本係陸路總兵統巡有名  
無實其輪巡外洋官兵應聽蘇松福山兩鎮調度  
考核並南漕營都司守備應與蘇松鎮標中營等  
六營一體輪巡外洋以資練習一會哨宜核實也  
定例蘇松鎮總兵與浙江定海鎮總兵又蘇松狼  
山福山三鎮總兵及各營將官按期互相會哨立  
法未始不善近年則該鎮將均止派弁由陸路取  
結呈報彼此並未謀面遇有盜案懦者懵然不知

黠者藉詞推諉實爲水師大弊節經臣等咨會浙

江撫臣並通飭江蘇鎮將必須親往巡哨一遇盜

船相機兜截另派幹練委員輪駐海口明查暗訪

如再虛應故事立即密稟核參徇隱同罪一堵緝

宜扼西也現查江蘇外洋奈山最爲喫緊臣等遴

委參遊一員帶領兵船在彼寄棹按季更換如值

該員在之其卽作爲過班遞推派調其統巡之

總兵除隨時遊巡外常年寄棹崇明縣之黑沙嘴

稽查策應倘仍收內港一經委員查出嚴參棚  
號示衆一配兵官足數也原定舳船一隻大舳板  
船一隻各配兵四十名小舳板船一隻配兵二十  
名棲宿時形擁擠偶值追逐洋盜技勇亦頗難施  
以致派不足數臣等自上年冬間兼得其弊核定  
大舳船配兵三十六名大舳板船配兵二十四名  
小舳板船配兵十六名無論內河外海一律照派  
試行倘覺相宜嗣後舊有船隻應卽照此派調仍

俟新造加寬加長之船工竣再行酌辦他如沿海  
接濟必先杜絕而後盜糧無可資下海私船必先  
查禁而後盜蹤無可假以及海口人戶俱照內地  
編查保甲藉清勾結而免窩藏一切應行事宜屢  
經<sub>臣</sub>等照案諄切通飭無庸另議更張至海洋捕  
盜之方誠如

訓諭必以不分畛域認真兜拏爲上策而畛域各存意  
見非獨鄰省難於兼顧卽本省界限亦有專司幾

至牢不可破此次通盤籌畫本省鄰省總期一力  
巡防聲勢聯絡分捕合捕責有攸歸守之以嚴行  
之以實不敢侈言成效尤不敢稍襲虛文以冀仰  
副

聖主綏靖海疆之至意謹會同署江南提督臣來英合  
詞恭摺具

奏伏乞

皇上聖鑒訓示謹

奏 道光二十八年七月十一日具

奏奉

硃批該部速議具奏欽此

籌捐添造外海水師戰船摺子

奏爲江蘇外海水師戰船不敷現擬籌捐添造恭摺

奏祈

聖鑒事竊照水師各營之駛船猶陸路各營之馭馬陸路尙可馬步兼用水師則非舟楫斷不爲功溯查水師定制總以諳習水務槍礮爲第一要義江蘇省額設外海水師九營原有放大船船舊式大船船共五十八隻輪班出洋自道光二十年各營官



兵派調防堵舍水守陸修造未遑漸致船隻缺額  
至二十二年存營存廠之船遂不可問水師因之  
廢弛嗣於善後案内欽奉

諭旨變通船政前督臣耆英查明江蘇外海惟放大舩  
船最爲合宜定議具奏復經前督臣璧昌遵

旨體察無異卽成造十二隻發交蘇松鎮標中左右營  
福山鎮標左營及川沙吳淞營共六營每營各二  
隻以一半配兵出洋一半存營按季輪替惟狼山

鎮標右營掘港南匯營亦係外海水師尙無放  
舫船所有舫板船隻出洋殊難應用綜計江蘇洋  
面自浙江至山東兩省交界南北二千餘里東西  
更爲袤延操緝巡防僅止舫船六隻爲數太少無  
論分捕合捕均難得力且盜船近從閩浙而來時  
以浙江漁山爲巢穴或三四隻或六七隻聚散無  
常北竄伺掠亦非舫船六隻所能分投抵禦臣等  
自上年冬間專委文職大員駐劄十激海口會同

蘇松狼山福山三鎮於存營舫船內酌調四隻湊  
成十隻又雇募民船二十隻並飭外海水師九營  
挑選兵丁以將備爲統領千把外委爲管帶配坐  
各船責成署蘇松鎮總兵田浩然爲總統分駐佗  
山及黑沙連頭等處要隘俾盜船寄碇無所始得  
稍有端緒節據擊沉盜船擒斬匪犯在案惟  
雇船巡洋本非長策而舫船十隻又須輪流修艙  
動形掣肘曷以添造船隻爲正辦卽飭據三鎮總

兵議請查照現在舳船式樣加長加寬添造三十  
四隻分給各營配兵巡緝如奈山外洋水深風大  
盜船冒險游奕商船失事大半在此雖經水師遵  
札輪駐一遇風潮仍須收回內洋聞廣東省艇船  
高大堅固能禦波濤議請仿造數隻以爲駐守奈  
山之用並據上海廳縣稟報紳商郁松年等因以  
泛海爲業情願捐資造船猶恐緩不濟急仍先雇  
募船隻水勇協同官兵巡緝等語臣等查水師巡

船原數此時照額造補勢有所難卽各該鎮議請酌添船三十四隻經費亦復不貲合力捐辦較爲易舉而捐項非尅期能集雇募船勇更不可以爲常應先籌款興造以期迅速因思善後存餘銀兩計尙可造大船十隻現擬飭司提撥趕緊設廠添造以爲之倡俟上海捐數有成卽行接續添造以三十四隻爲率餘仍歸補現提善後銀款所有上海捐造船隻及上年迄今捐雇船隻水勇之

紳富如公均堪嘉尚外此官紳客民如有捐  
貲造船者悉從其便統俟事竣後核明捐用銀  
額懇

皇上天恩俯賜查照江蘇省捐輸米石成案給予獎勵  
用昭激勸至廣東艇船必藉廣東舵水駕駛而於  
江蘇洋面尙難必其相宜如前此同安梭船試造  
不能合用欲賣則無售者欲改則爲棄材廢擱海  
塢忽經數載甚至本年正月因民間放燈遺火焚

燬一隻正在飭司嚴究是以艇船一項臣等未卽  
飭造擬先雇一隻試行如果適用再行酌辦除將  
整飭水師事宜另摺陳奏外謹合詞恭摺具

奏伏乞

皇上聖鑒訓示謹

奏奉

硃批另有旨欽此內閣奉

上諭李星沅等奏江蘇外海水師戰船不敷請籌捐添

造一摺水師戰船巡緝攸關必應多爲預備著准其將江南善後存餘銀兩先行提撥趕緊設廠添造所有上海捐造船隻及上年迄今捐雇船隻水勇之紳富人等均著准照江蘇捐米成案給予獎勵餘著照所擬辦理該部知道欽此



附奏積水漫溢圩岸兵船被風損傷片子

再本年入夏以來陰雨過多江湖並漲上游來源亦旺海口去路不能暢行濱臨江湖之區本多積水漫溢圩岸自高郵州車邏等壩啟放下河各州縣及淮南場籠均爲壩水所注低窪田畝近復被淹高原亦難守護又於六月二十二十一等日陡遇東北颶風海潮隨風上湧崇明通州等州縣民田沙地及通州泰州分司所屬各鹽場田廬人口

牲畜煎舍鍋蓬並沿江礮堤兵房汎署均有衝溢處所寶山等縣海塘亦間段濇損其蘇松狼山二鎮所屬巡洋兵船有漂至數百里始得收口者有撞擱淺灘者船身鼓裂損具不全尙有小舢板船二隻漂失無著幸未損傷人口福山鎮標及吳淞川沙等營船隻亦遭風損情形稍輕臣等業已會同督飭藩運三司飛速委員分段前往協同州縣場員查勘確實具報並先酌發銀兩隨處易錢安

頓露處貧民打撈淹斃屍身雖被災分數尙未勘  
齊而水患方殷民依可念應如何設法撫卹之處  
容再縷悉上

聞至外海兵船祇有此數此次遭風擊損委係人力難  
施並非駕駛不慎未便稍緩修葺致滋貽誤亦卽  
飭司委員馳勘籌款興修其未竣工以前飭令蘇  
松太道暫雇民船十隻交營配緝謹將被水被風  
大略情形及現在分別辦理緣由先行附片陳明

伏乞

聖鑒謹

奏

硃批知道了欽此

附奏江湖海同時並漲卽行馳詣清江會籌辦理  
片子

再查本年伏汎黃流尙稱順軌惟洪澤湖水日增  
長自仁禮智信河壩次第啟放七月初三日復開  
林家西壩水勢仍未見消堰盱各工最爲喫重初  
四日裡河廳屬之張王廟南岸微有坐墊當經廳  
營搶堵幸無他虞而高寶運河東堤亟須保護已  
開高郵州車邏四壩截至七月初六日始據下游

稟報消水八寸而上游據報存水尙在一丈四尺  
以外不得不寬籌去路疊經會同河臣潘錫恩飛  
飭常鎮道姚熊飛督同揚州府甘泉縣迅赴昭關  
壩與河廳相度機宜並義河一路亦俱察看水勢  
及時啟放無稍觀望稽延以資宣洩論目前大局  
必先顧堰盱而次及高寶然使高寶有事患亦等  
於堰盱所慮堤身日卑河身日仰來源過旺風雨  
不時遇東風則潮汐頂托高寶積水難消遇西風

則湖浪軒騰堰盱單堤更迫惟祝天晴風定得以  
化險爲平大汛方長刻深焦急臣現因江湖海三  
水同時並漲各屬絡繹報災均須上緊查辦計日  
稍有端緒卽行馳詣清江會籌一切又沛縣運河  
地屬江南王歸東河六月十三日至十九日連值  
大雨山水陡發湖河相連有浙江漕船二隻被風  
碰損當將米石起出交幫搭運尙無遲誤所有民  
修西埵漫成缺口卽飭趕緊搶堵以利漕行謹附

片縷陳伏乞

聖鑒謹

奏

硃批相機妥辦欽此



揀員請補淮安府知府摺子

奏爲遴員請補沿河要缺知府以裨地方仰祈

聖鑒事竊照淮安府知府福楸調取赴部引

見接准部文作爲二月二十九日開缺所遺淮安府知

府係衝繁疲難四項兼全沿河要缺歷經在外揀

補查該府管轄六縣瀆臨河湖水陸交衝訟繁俗

悍盜梟亦多出沒且當各省重空漕艘經行要道

並有協理河工修防事宜巡緝撫綏均關緊要必

須精明幹練熟悉情形之員方足以資整飭臣等  
於通省知府及同知直隸州內逐加遴選非現居  
要缺卽人地未宜惟查有卽補知府王夢齡年五  
十歲順天大興縣人祖籍廣東由監生捐納運判

改補知縣

題補沭陽縣知縣升補揚州府總捕同知於署海州  
任內因案降調送部引

見仍以同知歸部選加捐分發江蘇歸候補班補用道

光二十二年七月到省委審捻匪出力奏奉

上諭著於補缺後以知府升用先換頂帶欽此

題補江甯府江防同知二十四年四月到任挑築六塘河出力二十七年七月奉

上諭著開缺以知府卽補欽此該員通敏卓練守潔才優以之請補淮安府知府人地相宜實堪勝任合無仰懇

天恩俯念要缺需員准以卽補知府王夢齡補授淮安

府沿河要缺知府洵於地方漕運河工均有裨益  
如蒙

俞允俟部覆至日照例給咨送部引

見一切因公處分遵例毋庸核計該員由知縣升補同  
知今請補知府係屬再升前在海州沐陽及揚州  
府總捕同知等任內應完罰俸銀兩已據完繳造  
冊咨銷據藩臬兩司會詳前來謹會同江南河道  
總督臣潘錫恩合詞恭摺具

奏伏乞

皇上聖鑒訓示謹

奏 道光二十八年七月二十二日具

奏奉

硃批吏部議奏欽此

兩淮場竈被水較重現籌撫卹摺子

奏爲兩淮場竈被水較重現在籌辦撫卹緣由恭摺

奏祈

聖鑒事竊照場竈地近海濱竈丁煎鹽爲業羣資棲食

本年入夏以後陰雨過多江湖竝漲兼之壩水下

注風潮衝溢各屬鹽場被淹先經臣會同撫臣飭

委查辦附片陳明在案旋據鹽運使但明倫詳報

遴委試用運判武祖德范維璘宋玉瑤試用大使

韓茂萱分赴通州泰州海州各場會督分司大使  
確切查勘節據聯銜查稟泰屬東臺等十一場因  
上游車邇等四場齊開西水奔騰湧注海口去路  
未暢又於六月二十二等日陡遇颶風大雨  
海潮頂托埤場窳蕩煎舍鍋篷悉被淹浸垣鹽淌  
消人口間有淹斃業已打撈棺瘞其遷避高阜處  
所窳戶煎丁蓬居乏食深堪憫惻先由該分司大  
使捐給米麥饘餅暫濟目前請卽發銀撫卹通州

海州各場同被風潮情形輕重不等尙未損傷人  
口由運司轉稟前來臣查兩淮濱水之區遠近均  
多巨浸卽儀徵捆鹽地面亦有積水無處捆掣兼  
聞漢江一帶水勢方盛綱鹽銷路阻滯大局實切  
隱憂至各場猝遇水災蕩析離居窮丁本鮮蓋藏  
尤爲顛連困苦自應卽就被水較重實在乏食之  
戶先予分投接濟臣已批飭運司籌撥撫卹銀一  
萬兩迅卽委員易錢解赴泰屬各場隨查隨放又



通屬災重之呂四等場由司速爲酌給竝查鹽義  
倉穀分貯揚州及通泰地方原備救荒之用亦飭  
就近查明酌撥上緊運往按埤專給以資口食總  
在各按場分或錢或穀分別散放不准重複浮開  
一面諭令運商另擇高阜捆場趕措貲本赴場趕  
運不必拘定交課重鹽之例致令垣儲益耗丁力  
益艱仍俟運鹽到儀再行完足課銀方准開江以  
示限制其被災輕重等差應俟水勢稍平由委員

等確勘詳報照例辦理謹會同江蘇巡撫臣陸建  
瀛合詞恭摺具

奏伏乞

皇上聖鑒謹

奏 道光二十八年七月二十二日具

奏奉

硃批知道了欽此

勒休池州營都司王全德摺子

奏爲甄別年力就衰之都司請

旨勒令休致恭摺奏祈

聖鑒事竊查定例守備以上等官年屆六十三歲甄別  
畱任三年後再行甄別一次等語茲有安徽池州

營都司王全德現屆六十六歲經安徽撫臣王植

照例考驗咨送會辦前來臣查該都司由雲騎尉

世職補授守備推升今職平日操防尙無貽誤惟

覆加考驗氣體實形衰弱步射僅中一矢未便任其戀棧相應請

旨將安徽池州營都司王全德勒令休致以肅營伍所襲雲騎尉世職咨明該員原籍直隸照例辦理除查取原領劄付咨銷外謹會同安徽巡撫臣王植合詞恭摺具

奏伏乞

皇上聖鑒訓示謹

奏 道光二十八年七月二十二日具

奏奉

硃批另有旨欽此內閣奉

上諭李星沅奏甄別都司一摺安徽池州營都司王全  
德年力就衰著卽勒令休致餘著照所擬辦理該部  
知道欽此

附奏委署華亭縣知縣片

奏再署華亭縣事試用知縣竇塾現飭回省差委所遺華亭縣係沿海要缺政務殷繁必須幹員接署方足以資治理查有卸署江陰縣事之金壇縣知縣王清渠堪以調署據藩臬兩司會詳前來除批飭遵照外謹合詞附片陳明伏乞

聖鑒謹

奏

殊批覽欽此

附奏提審京控咨交案件片子

再查京控咨交案件每屆半年例應查明有無承  
審提解遲延職名分別具

奏茲屆道光二十八年上半年彙奏之期據江甯布  
政使查明詳報前來臣查上屆奏報截至二十七  
年年底尙有未結甘泉縣捐職王浦松一起已據  
詳咨完結今截至二十八年六月底僅有續准咨  
交如臬縣監生姜漣一起因該原告先已外出尙



須究追下落再行飭提核計承審提解均無遲逾  
又上年九月內准直隸督臣咨會吳江縣民楊半  
溪赴京呈控咨解來江行至新城縣脫逃將原呈  
繳銷咨會嚴緝嗣於本年正月內據該民人楊半  
溪鈔詞投到飭令蘇州藩司就案訊辦現尙未據  
審詳所有此案承審提解遲延職名應俟詳咨至  
日隨案聲叙理合附片陳明伏乞

聖鑒謹

奏

硃批知道了欽此

附奏捐廉辦賑片子

再本年河湖水勢增長及會籌宣洩緣由節經先後附片

奏明在案自林家西壩開放以後因張王廟南岸缺口堵合水復驟漲七月初十日在所堵壩工池西平漫過水壘塌口寬八丈五尺幸水勢平緩仍由護城河歸白馬高寶等湖卽經河臣督飭道將廳營趕做盤頭暫緩堵閉以防水勢擡高又於十三

日將義河開放洪澤湖水稍定惟時當秋令潮汛異常又連日東北大風逆流頂托江水不能入海河水不能入江兼以江廣安徽數省之水建甌而下來源盛漲爲近年所罕有湖河兩路中滿均仗一線單堤前因義河當開卽議續啟昭關壩以資分洩鄉民再三求緩據河營參將呂邦治前往察看昭關壩下已爲車邏等壩減水漾及土舌壩門本不甚寬啟放亦難暢消然當萬分緊急之時究

屬多一去路業經會同河臣分委大員馳往開導  
鄉民毋再阻護迅速相機啟放日來曾否過水尙  
未接據稟報至沿江圩岸多有衝決之處省城低  
窪處所亦水深三四尺外間灾黎避水勢將輕去  
其鄉若俟委員勘齊仍恐緩不濟急臣已督飭署  
藩司等先行捐廉董勸預謀棲食竝仿前人圖賑  
之法量力出貲就近收養務令鄉各爲卹而不聚  
於一城縣各爲卹而不聚於一郡暫籌安集大略

劉切札示責成地方官會商公正紳耆妥慎辦理  
臣卽日出省沿途查看情形前詣清江面晤河臣  
籌辦謹附片陳明伏乞

聖鑒謹

奏

硃批用心妥辦欽此

查看水勢馳抵清江面晤河臣商摧卽回省城督  
辦勘灾勸捐事宜摺子

奏爲沿途查看水勢馳抵清江面晤河臣商摧恭摺  
奏祈

聖鑒事竊本年六七月間江淮海同時異漲爲近年所  
未有疊據河臣函商宣洩竝擬前赴清江面爲籌  
辦附片

奏明在案臣卽暫委署藩司代拆代行於七月二十

八日出省連值東北風頂阻浪急舟遲大江兩岸  
圩田漫溢過半村房市店濱水亦多被淹四面汪洋  
幾無涯際自瓜洲進口至揚州府據報昭關壩  
於二十五日啟放數日水已消動自揚州而上爲  
揚糧廳汎運河水深溜偏斷續平堤八月初二日  
寅刻忽起大西北風波聲騰沸驚駭怒撞因念一  
線危堤積漲瀾漫復何堪此搏擊中夜起立髮心  
如焚幸不踰時頓息又上爲揚河廳汎所轄一百



七十五里中歷高郵寶應兩州縣堤身最長險工  
疊出該廳員加夫加料會營晝夜搶鑲不遺餘力  
自車南中新四壩齊開近又啟昭關壩水始遞消  
現存一丈六尺有奇各工仍關緊要卽飭一律嚴  
防不准日久稍懈過此爲裡河廳汎至淮安府地  
當高寶上游水性就下漸覺平緩臣卽於初五日  
行抵清江查運河附近各湖早已連爲一氣重以  
洪湖東注萬派奔騰來勢最爲洶湧又各壩減水

亦爲江海大潮倒漾擎托疏洩不靈中滿必將四  
溢三溝閘誌椿積水二丈二尺四寸詢之鄉民船  
戶皆稱運河從來無此大水幸盛漲五十餘日東  
北風多間有西北風暴不過片刻卽止故雖屢瀕  
危險仍獲平安實皆仰賴

聖主洪福

神祇效順思之倍深欽凜此時洪澤湖水報落已四  
五尺當無他慮清河張王廟缺口已於七月二十

九日合龍林家西壩亦於八月初三日堵閉運河  
來源較少可期積漲疏消惟義河壩過水甚暢竝  
仁智禮信各河壩均應次第相機堵合日前黃河  
水長現亦落四五尺如何籌防大汎河臣潘錫恩  
具有成算臣連次面晤悉心熟商卽當駛回省城  
督辦勘災勸捐諸務所有沿途查看及河湖現在  
情形謹繕摺具

奏伏乞

皇上聖鑒謹

奏 道光二十八年八月初六日具

奏奉

硃批知道了欽此 又於駛回省城督辦勘災勸捐句

旁奉

硃批盡心盡力惠我災民欽此

沛縣民堰埽壩各工修築完竣摺子

中華書局圖書

奏爲沛縣民堰埽壩各工修築完竣謹將工長  
銀數循例開單具

奏仰祈

聖鑒事竊照徐州府屬沛縣夏鎮運河寨子民堰爲漕  
運經由要道道光二十四年雨水山水疊漲被冲  
缺口坑塘委員會同該縣勘辦因運河水大西岸  
民堰劉昌莊池北並常家口等處漫刷缺口五處

均應補築計工長一百五十三丈五尺又寨子民  
堰缺口夾壩各工計工長一百六十五丈其估需  
料土夫工銀四千七百九十六兩一錢三分七釐  
又寨子迤北臨河灘面冲成大缺口二處應搶築  
埽壩一道計長二十五丈估需夫工椿料銀一千  
六百二十七兩九錢三分九釐又二十六年十月  
內據該縣以寨子一帶堰形卑薄稟請自劉昌莊  
以北至三孔橋人家頭止加高工長一千一百二

十七丈其寨子北首冲成缺口處所應靠河唇圈  
築共長一百五十二丈五尺六寸又填築常家口  
一帶缺口二處共長十八丈總共工長一千二百  
九十七丈五尺六寸估計土方銀四千一百六十  
五兩七錢一分一釐又運河東岸有民便閘一座  
請在該處創建雙孔減閘滾水石壩一座洩水入  
湖每孔寬一丈八尺實留金門三丈六尺中砌雞  
心垛一座寬六尺裏頭及雁翅砌石十七層滾水

壩砌石十一層共估石料椿木錠扣灰米夫工等  
項銀二千九百八十二兩五錢八分二釐以上民  
堰各工通共估銀一萬三千五百七十二兩三錢  
六分九釐據該縣等先後稟請借項興辦分年攤  
徵還款委據徐州府並銅山縣等分別會勘明確  
經前督臣璧昌批准給辦據該縣等先後照估辦  
竣飭委蕭南同知彭以竺暨徐州府查驗如式並  
無草率偷減所用銀兩議請歸於民田分作八年



未敢據情人奏仍飭妥爲勸諭上緊回帆無再觀望並飭密諭暎夷領事啊利國上海通商西洋國已不少若再令哦囉嘶撓越貿易甚非該國所宜應卽隨同開導茲據該道覆稱啊利國函送該船主稟開已擬放出港口由卽日起限二十五天修船已畢起旋駛回斷不有誤發還船牌貨單人名單三張俱已受回等情臣等復查該船舵水人等共二十八名有礮六門計貨二百餘噸值錢二萬

卷之五 奏議 卷之五 江甯 全  
餘干似不過希圖貿易然既違定例卽斷難准行  
且安知非故爲嘗試夷情叵測不可不爲預防故  
於稟求請

旨當卽正言拒絕使之無所覬覦以杜後患旣據立限  
出口情願原船駛回卽批飭該道於該船起旋時  
賞給食物並派水師將官隨同防護送出江蘇洋  
面明示懷柔仍將該船出口日期飛速具稟另行  
奏報謹繕摺縷陳伏乞

皇上聖鑒謹

奏  
道光二十八年八月初六日具  
奏奉

硃批所辦甚是可嘉之至欽此

附奏調署上元縣知縣片子

奏再上元縣知縣李映棻請調南匯縣知縣業已接  
准部覆欽奉

俞允應行飭赴新任所遺上元縣知縣員缺係省會首  
邑政務殷繁時有發審案件非精明強幹之員弗  
克勝任查有阜甯縣知縣屠元瑞堪以調署據藩  
臬兩司會詳前來除批飭遵照外理合附片陳明  
伏乞

聖鑒謹

奏

硃批覽欽此

附奏縷陳辦賑情形片子

再本年水災較廣安徽省懷甯貴池銅陵無爲州等三十餘州縣江西省德化湖口彭澤鄱陽等十餘州縣均經臣接據稟報函商兩撫臣督飭查辦

江省濱江濱海堤垸衝溢頗多下河一帶及泰屬

鹽場災象尤重節次會同撫臣分飭藩運兩司動

款發銀委員先赴興化泰州高郵寶應東臺五處及鹽場災區會查撫卹並飭將省城豐備倉揚城

鹽義倉各州縣常平倉社倉穀石酌量碾米備用  
一百先捐廉銀率屬飲助並董勸紳富量力出貲  
任卹分晰救災急務各就地方情形妥速照辦舉  
凡應撫應賑額懇

恩施之處統俟各屬勘齊核計被災分數由撫臣會摺  
具

奏此次沿路咨訪目擊窮黎轉徙或避高阜或就窪  
棲待哺嗷嗷實堪憫惻蓋由被水以後家業一空

其殷富有力者自能擇地移居其老病無力者止  
能就地覓食餘則本境安撫誠爲善策然必有不  
甘坐困者是以收養資送原須相輔而行若當無  
家可歸則收養尤切溯查道光六年十一年江省  
辦理水災大縣收養二千口小縣收養一千口以  
三箇月爲率歷有成案可循早經通飭各州縣擇  
城外寬大寺院兼用蘆蓆搭廠或散錢米或具饘  
粥以餬口食如收養人數逾額卽給資分送前途




裏多益寡或他鄉親故可依或熟地傭工可趁亦聽其自謀生路總不使聚於一隅近由揚州過江者逐日以數百計並飭多備渡船派差押護毋許爭先擁擠仍嚴查匪徒冒充災民如江北崩船倒撐船之類官紳照章設局於五臺山瓜洲口兩處經理尙爲詳慎至啟放昭關壩遲之又久壩下民田早稻均經刈穫所種晚稻之處類多先種豆麥已趁春收裏糴不爲無助且家居臨水每有自製

小船足備緩急要皆風餐露宿蕩析離居但有拯  
濟之方亟宜上緊籌辦臣舟次接見各屬復加諄  
切告誡共矢天良能多盡一分心卽少造一分孽  
日盼水勢消退秋汛安瀾俾各專力災區勉紓  
慈注謹附片縷陳伏乞

聖鑒謹

奏

硃批竭力爲之切勿延緩欽此



揀員調補上元縣知縣摺子

奏爲揀員調補省會要缺知縣恭摺奏祈

聖鑒事竊照上元縣知縣李映棻請調南匯縣知縣接  
准部咨欽奉

諭旨允准行文作爲七月十七日開缺所遺上元縣知  
縣地居省會政務殷繁且時有發審案件必須精  
明強幹之員方足以資治理臣等於現任簡缺知  
縣及應補應升人員內詳加遴選非現居要缺卽

人地未宜一時實無合例之員惟查有阜甯縣知縣屠元瑞年四十五歲順天舉人乙未大挑復挑河工引

見奉

旨以河工知縣用欽此籤掣南河借署鹽城縣縣丞防汛出力奉

旨賞加升銜道光二十四年審辦盛劫拒捕戕官案内奉

旨以應升之缺卽行升用欽此

題補安東縣知縣二十六年七月初八日先行任事  
八月初八日奉文准補因與山安同知譚祖同姻  
親廻避

奏准撤回畱省另補

題補阜甯縣知縣二十七年八月二十四日奉文准  
補二十八年三月初十日到任查該員年強才裕  
明幹有爲以之調補上元縣知縣洵堪勝任其本

任阜甯縣係兼三要缺今請調省會首邑最要之  
缺與例亦屬相符惟歷俸未滿三年人地實在相  
需例得聲明專摺

奏請合無仰懇

天恩俯念員缺緊要准以阜甯縣知縣屠元瑞調補上  
元縣知縣實於省會要缺有裨如蒙

俞允該員係現任知縣請調知縣銜缺相當毋庸送部

引

見一切因公處分遵例毋庸核計該員係由安東縣廻  
避撤回補還阜甯縣今請調補上元縣知縣係屬  
初調應完罰俸銀兩飭令依限完繳造冊咨銷所  
遺阜甯縣知縣容俟部覆知照截缺再行遴員請  
調據藩臬兩司會詳前來謹循例合詞恭摺具

奏伏乞

皇上聖鑒訓示謹

奏 道光二十八年八月十六日具



奏奉

硃批另有旨欽此內閣奉

上諭李星沅等奏請調補省會要缺知縣一摺著照所  
請江蘇上元縣知縣員缺准其以屠元瑞調補該部  
知道欽此

敬陳愧悚下忱摺子

奏爲敬陳微臣愧悚下忱恭摺奏祈

聖鑒事竊臣於揚州途次接准山東撫臣咨開奉

上諭徐澤醇奏海洋盜船乘風游奕現飭實力防捕一

摺本年海運糧船由東洋赴天津沿途並無疏虞乃

現在南糧甫經運竣卽有閩廣盜船多隻在外洋乘

風游奕意在伺劫回空漕船且已有商船被劫之案

如果水師弁兵仍前嚴密巡防何至盜踪肆無忌憚

李星沅陸建瀛來英均著傳旨嚴行申飭仍著將疏防各將弁分別查明據實核辦此時各商船交米或赴盛京均須南返易爲盜匪窺伺仍著李星沅陸建瀛尤渤速卽揀派水師得力將弁分路帶兵兜捕務將游奕匪船擊沉獲犯盡法懲辦斷不准遷延諱飾疏縱干咎凜之等因欽此

臣跪誦之餘悚息無地除轉行欽遵外伏查江蘇外海戰船無多水師廢弛盜案疊出

臣勉力督辦經年指參鎮將各員隨時

據實上

聞未敢稍存諱飾當議行海運之始輒慮風濤萬頃鬼  
蜮百端既不能四面合圍復不能一徑攔截亟須  
先事籌備所有派撥兵將多方護運悉由祇承

訓示參考舊章並因山東石島俚島廟島等處向多盜

船伺劫設有登州鎮總兵管轄水師兩營疊經臣

咨會山東撫臣一體飭緝幸而漕船風利安抵津

口實

聖主如天之福非人力所能爲迨護運官兵從山東登  
州南返循案歸伍本省例巡兵船照常偵緝無聞  
仍飭總兵統巡駐黑沙連頭參將遊擊分巡駐奈  
山錨地竊計漕船回棹易爲洋盜所窺猶恐船少  
兵單捍衛不及復飭上海道縣董勸紳商捐雇勇  
船隨同官兵巡緝適大船船在洋陡遇颶風碰撞  
又經飛飭該道縣趕雇寬大民船十隻前往更替  
應用並飭候補道吳健彰馳赴十墩認真稽查稟

揭無稍疏懈又准閩浙督臣咨會已飭閩浙提鎮  
調集兵船籌剿浙江之南漁山盜巢方冀連界截  
拏或可肅清洋面乃昨據蘇松太道稟據上海商  
船黃椿年陸德發等旋經東洋突於大沙左近遇  
盜圍掠並將商船拉至石島勒銀取贖其俚島南  
北黃城等處亦有盜船伺劫擬派水勇船十四隻  
由道給發護照馳往東境迎護並請速咨山東奉  
天嚴飭舟師防剿等語當卽據情飛咨隨查失事

處所究在何省何營境內分別參辦茲復欽奉前  
因<sub>臣</sub>思盜踪出沒每以此拏彼竄爲常海市迷離  
又以此推彼誘爲巧如閩廣盜船游奕類多來自  
浙江誠能由浙溯閩由閩溯廣自無難窮源竟委  
掃穴犁庭無如事勢多睽遂致挽回鮮效東洋在  
望兼顧未遑<sub>臣</sub>仰負

主恩俯慚官謗夙夜循省咎戾滋深現經凜遵

嚴諭會同撫<sub>臣</sub>提<sub>臣</sub>添派水師得力將弁飛速帶兵分

路兜捕遇有盜船南駛立即奮勇擊擒盡法懲辦  
斷不容強分畛域致滋延縱所有微臣愧悚下忱  
謹繕摺具

奏伏乞

皇上聖鑒謹

奏 道光二十八年八月十六日具

奏奉

硃批江南水師之不振其誰不知若再不嚴加整飭盜



劫公行何所底止勉之慎之欽此

臚陳江潮積漲情形並回署日期摺子

奏爲臚陳江潮積漲情形並

臣由浦回署日期恭摺

奏祈

聖鑒事竊

臣

於八月初五日馳抵清江謹將沿途水勢

及清水黃水漸就平穩縷悉

奏明在案因念省城重地正當災務紛紜卽行轉棹  
駛回一路覆加察看惟揚河廳屬存水尙在一丈  
五尺以外依然拍岸盈堤雖經搜鑿護掃加築土

埧設遇西北風暴仍難必其無他幸連朝風小天  
晴臣水陸兼程卽於八月十二日抵署所過殘圩  
積潦禾場茅舍多在水中舉目實增愾歎省城方  
塘曲渚無不通潮近以潮汎倒漾漫入街市臣往  
返旬餘又添水一二尺深者幾可泛舟較之道光  
十一年二十一年水勢更大小民貿易鮮獲直與  
農田被水同一拮据行路沮洳澗難立待蓋由江  
廣安徽四省同時大水建瓴東下均須由江入海

重以海門擎托江省適當其衝以致積水四溢先  
經臣疊札飛飭啟放壁虎橋灣頭閘人字芒稻等  
河以暢歸江之路又飭啟放白駒青龍大團小海  
等壩以暢歸海之路無如風潮頂阻平漫不流運  
河水亦因此河臣前啟義壩在安清江淮郡之人  
心嗣啟昭關壩在安高寶揚郡之人心明知利害  
參半而實萬不得已此次面商大局瀕臨洪湖諸

壩自應先爲堵閉惟義河外越工段較長河臣頗

致躑躅

臣

以經費有常必須通盤籌畫分別緩急

樽節辦理但能酌盈劑虛當可工堅費省茲已節  
逾白露計日積水消落黃流佇報安瀾其回空軍  
船向遇運河大水繞湖行走無誤容俟屆期相度  
妥慎商辦

臣

夙夜焦慮固在河患尤在水災當此

民生昏墊收養與資送自宜相輔而行賑務殷繁

請

帑與勸捐更宜相資爲用查江南省會捐局略有眉

目餘皆次第舉行臣道過揚州復飭運司先撥鹽  
義倉穀十五萬石分給災區拯濟鹽商捐穀捐銀  
悉從其便所需撫卹銀兩早經由司核發事竣彙  
冊報銷現飭署江甯布政使積喇明阿親赴被水  
各州縣逐處履勘約計用款詳由撫臣會

奏臣奉職無狀波及地方惟當益殫血誠勉紓重困  
以期上慰

鴻慈於萬一所有江潮積漲及臣回署日期理合恭摺

具

奏伏乞

皇上聖鑒謹

奏 道光二十八年八月十六日具

奏奉

硃批核實妥速辦理務期實惠及民以慰塵念勉之欽  
此

附奏運鉛人員請借讓漕銀兩片子

再前准部咨運鉛人員實因遭風沉溺以及守壩讓漕等事請借銀兩分別

奏明酌借所借之數不得浮於應銷之數並經江省議請按日計算如數在五百兩以內者應卽照數給領倘守候日久仍照向借章程不得逾五百兩之數其應借之銀須俟事竣方准請借等因在案茲有貴州領解戊申年上運一起京鉛委員永甯



州知州周獻廷領解戊申年上運二起京鉛委員  
署都勻縣事普安縣知縣謝人龍領解戊申年下  
運一起京鉛委員修文縣知縣英達領解戊申年  
下運二起京鉛委員安順府同知許大綸均因行  
抵清河縣境停讓重漕不容漫越更兼禦黃壩堵  
閉未能前進停泊五十餘日核計每日食米鹽菜  
銀兩應領之數均在五百兩以外各請借讓漕銀  
五百兩稟出署江甯布政使積喇明阿核與定章

相符應准借給等情詳請具

奏前來

臣

覆核無異除批飭在於司庫雜稅款內借

給周獻廷謝人龍各銀五百兩又於司庫漕價款

內借給英達許大綸各銀五百兩催令趲運前進

並咨黔省於各該員應得養廉及報銷我領銀內

扣繳造報江省作正開銷暨咨部查照外理合附

片具

奏伏乞

聖鑒謹

奏

硃批該部知道欽此

附奏秋季輪閱礮堤請俟水涸演閱片子

再沿江礮堤奏定章程由總督提鎮輪流查閱操

演本年秋季輪應臣往閱視因六七月間屢據各

營縣稟報江潮泛漲繼以風暴礮堤雖未衝坍而

堤根多有積水兵房亦間被浪激損臣於未經出

省之先飭委候補遊擊鄭振乾馳赴沿江逐一查

勘惟五龍山圖山關鷺鼻嘴三處礮臺藥庫兵房

尙無積水其餘礮臺出水自一尺至六七尺不等

積水自數寸至五六尺不等土櫛間有浪激雨淋  
痕蹟兵房牆壁亦有損傷礮位照舊安設並無鬆  
動情形藥彈均先移貯營庫亦無損失惟值秋潮  
旺盛消退尙需時日無從操演等情稟覆前來臣  
舟行所過親加覆勘核與先後稟稱無異所有秋  
季巡閱礮堤應請俟水涸土乾後詳加察看堤根  
有無損壞修築堅固再行演閱理合據實附片上

聞謹

奏

硃批知道了欽此

拏辦山東逸犯摺子

奏爲遵

旨督屬嚴拏東省逸犯並陳辦理情形恭摺覆

奏仰祈

聖鑒事竊

臣

等承准軍機大臣字寄道光二十八年七

月十二日奉

上諭徐澤醇奏兩省接壤地方匪徒聚衆訛搶拒捕一

摺據奏山東日照縣地方有南來匪犯九十餘人乘

馬持械在該縣與昔州及江蘇贛榆縣交界地方公肆訛掠該地方官等會同營汛督率兵役奮力追捕傷斃匪犯四名擒獲現犯徐和尚一名餘匪零星竄匿等語該匪等膽敢糾眾公然肆掠拒捕該地方兵勇如果得力似此數十烏合之眾何難悉數殲除惟現在紛紛竄匿若不將首要各犯按名捕獲必至養靡貽患况兩省交界向爲鹽梟出沒之區倘查辦稍疏將來勾結滋事更煩兵力自當及早殲除免貽後



悔著李星沅陸建瀛徐澤醇嚴飭各該屬地方文武  
各官不分畛域合力兜拏彼此照會一遇劫盜卽將  
首要各犯悉數擒獲毋任一名漏網所有該管文武  
各員著上緊購緝嚴緝匪犯務獲以贖前愆倘案犯  
不能全獲卽著嚴參懲處欽此當卽轉行欽遵臣等

伏查此案先准山東撫臣徐澤醇鈔錄逸犯名單

咨飭贛榆縣合力兜拏當以江蘇省徐州海州二  
屬均與山東毗連而徐州府屬各州縣尤多大牙

相錯每有此拏彼竄之事徐州之堵捕較海州尤  
爲緊要東省單開逸犯六十八名內有海州人邵  
大等三名餘皆籍隸山東並無一名住居徐屬者  
該匪徒性情譎詐每多一人而有數名或隱匿真  
名的姓實在居址而捏造假名指東話西以圖免  
脫該省所訊徐和尙供詞恐難盡信當經飛飭徐  
州鎮道海州知州參將並另委幹員馳詣該處督  
飭地方文武各官無分畛域協力堵拏不准互相

效尤稍存推諉疊據徐州鎮道稟報派委緝拏匪徒之都司馮景尼帶同徐州安徽山東兵役於六月十二日在邳州更町社地方見有結捻匪徒上前搶拏獲匪劉泳升等十五名內有李戊戌等二名畏罪自戕身死救出被擄之陳開江一名奪獲大小火槍八桿刀械十四件馬二匹有兵丁周度安等三人被拒受傷尙不深重又於七月二十三

日在銅山睢甯交界之詹家莊地方遇見南來捻

匪數十人該都司督飭弁兵差役拏獲擒首杜添  
榮等二十二名奪取擡槍八桿火槍一桿刀械十  
六件餘匪逃至運河邊梟水逃逸又淹斃多名因  
天晚水溜不及過河追趕有兵丁胡鳳祥被匪開  
槍拒捕轟傷身死又兵丁夏永順等十名亦被拒  
受傷所獲各犯內有汪近俎等八名被格受傷旋  
卽斃命以上二起人犯是否卽係徐和尙等夥黨  
正在飭訊確供分別核辦間旋據山東撫臣徐澤

醇咨會從前徐和尚供出夥犯姓名俱係傳聞混  
供另開名單咨會飭緝前來臣等詳加查核山東  
省第二次名單與第一次大相逕庭其沂州府移  
會徐州府等飭拏犯名亦不甚符合惟邳州拏獲  
之高奉寅卽高鳳銀一名與單開相符又海州拏  
獲之魯六姜愛沅二名單內雖無其人而自認夥  
搶日照縣事主銀錢不諱卽此更見犯名蹤蹟實  
無一定若僅按名指拏按址搜索徒成海捕適墮

匪徒奸狡避就之方且遂地方官推諉粉飾之計  
臣等惟有嚴督所屬不遺餘力有犯卽拏有案卽  
辦務祛敷衍彌縫惡習以期匪徒斂蹟仰副

聖主除惡務盡之至意除飭將現獲各犯迅速研究確  
供如係徐和尚案內夥犯卽行解東審辦餘俱各  
歸各案從重擬結並咨會東省再行提犯確訊務  
得真名的姓分別查拏外謹恭摺覆

奏伏乞

皇上聖鑒再徐海二屬拏獲匪犯除前次奏報及劉泳  
升等各起外截至現在止徐州府屬又獲匪犯二  
百五十四名海州及贛榆縣又獲匪犯四十六名  
均經批飭各歸各案嚴速審辦無稍寬縱合併陳  
明謹

奏 道光二十八年八月二十四日具  
奏奉

硃批所辦好仍當督飭嚴緝不可稍懈欽此

哦囉嘶商已由吳淞口放洋摺子

奏爲哦囉嘶商船一隻已由吳淞口放洋駛去恭摺  
奏祈

聖鑒事竊照哦囉嘶夷商李噸北裝載狐皮麪粉等貨  
至上海地方懇求驗卸當經臣等將批飭開導及  
該夷遵奉出口緣由先行具

奏一面札行蘇松太道督飭該管營縣妥慎防護毋  
許登岸並禁止民船駛近夷船私相交易查明來



蹤去蹟稟覆察辦茲據該道麟桂等稟稱該夷船  
於出口後趕緊修脣並未登岸亦無奸民勾串往  
來隨經問明行期賞給羊酒食物該夷深爲感悅  
已於八月十三日乘風起棹望東南大洋而去當  
卽知會蘇松鎮總兵派撥兵船押護出境第恐該  
夷船行駛迅速兵船趕護不及無從交替鄰省該  
道等復向暎咭喇咪喇啞嘒嘒晒各夷詳加詢問  
僉稱哦囉嘶邊界與西洋各國接壤彼此互市多

年李頓北商船係由俄囉嘶泛海而來止求通市  
並無別故其起旋之際聲言仍回本國各該夷亦  
皆稔知等情臣等伏查俄囉嘶爲北地陸路通商  
之國今忽航海而來誠恐別有隱情密加採訪始  
知該國邊界與西洋各國毗連船隻亦復相仿核  
與蘇松太道所稟無異其爲來自西洋似無可疑  
先經稟求貿易該道等遵照批飭明白曉諭亦卽  
俯首無詞具限出口茲將原船起旋望東南大洋

駛去情形尙爲馴順惟該商船既至上海難保不  
往沿海各省希圖卸貨除飛咨浙江福建廣東一  
律查探外所有該夷船放洋駛去日期謹合詞恭  
摺具

奏伏乞

皇上聖鑒謹

奏 道光二十八年八月二十四日具

奏奉

殊世知道了欽此

籌撥幫丁行月等米摺子

奏爲幫丁行月等米緩缺不敷支放循例籌撥濟用  
恭摺奏祈

聖鑒事據江安督糧道沈兆澧會同署江甯布政使積  
喇明阿蘇州布政使李德安徽布政使蔣文慶詳  
稱江淮興武二衛各幫及鳳陽各幫長淮頭幫應  
支道倉月糧米石向於各屬徵解南撫米內派支  
今道光二十七年分各屬額解道倉南撫米內銅

陵和州六合等州縣被有偏災其計緩徵米一萬  
一百四石五斗八合三勺加以道倉歲額不敷除  
減船減支外實應籌補米七千一百八十一石七  
斗一升四合一勺又六合縣未完道倉道光二十  
五六兩年分熟田撫米因災緩徵均應籌補計二  
十五年分熟田緩徵米三千六十六石五斗五升  
三合六勺二十六年分熟田緩徵米二千三十石  
六斗三升二合一合又鳳陽江興等衛各幫道光二十

七年分現減丁船應支州縣月糧災緩不敷派支  
米一千二百五十七石七斗三升二合八勺通共  
緩缺米一萬三千五百三十六石六斗三升二合  
五勺內除江興各幫道光二十一年冬減船借支  
四成月糧續據詳請分限扣還今於道光二十七  
年分應支改本行糧項下扣回原動江浦縣二十  
一年分正漕抵支米二百八十石二斗四升又扣  
回原動六合縣二十年分撫米抵支米一百五十

三石三斗六升又原撥當塗縣道光十九年分緩  
漕派支江興各幫減船借給月糧扣抵米一百二  
十四石二斗又道光二十六年分撥漕案内寬撥  
倉穀碾米六百八石四斗三升二合三勺五抄均  
應留爲道光二十七年分道倉災缺抵支外仍緩  
缺不敷米一萬二千三百八十石四斗一勺五抄  
查有無爲合肥舒城巢縣吳江常熟金壇等州縣  
派剩道光二十四五六七等年分存倉行月並六



合縣帶徵撫米共計一萬二千三百八十八石四斗  
一勺五抄堪以動撥濟用所有支給米數另於該  
年奏銷冊內分晰造報等情會詳請

奏前來臣查幫丁行月等米均計口授食要需今既  
緩缺不敷自應循例籌撥相應請

旨將無爲合肥舒城巢縣吳江常熟金壇等州縣存倉  
行月併六合縣帶徵撫米照數撥足以濟支放另  
於該年奏銷冊內造報仍令災緩州縣按限帶徵

完款謹會同漕運總督臣楊以增江蘇巡撫臣陸  
建瀛安徽巡撫臣王植恭摺具

奏伏乞

皇上聖鑒訓示謹

奏 道光二十八年八月二十四日具

奏奉

硃批另有旨欽此內閣奉

上諭李星沅奏幫丁行月等米緩缺不敷支放循例撥

濟一摺幫丁行月等米均關計口投食現據該督奏稱不敷支放自應循案撥給著照所請准其將無爲合肥舒城巢縣吳江常熟金壇等州縣存倉行月並六合縣帶徵撫米照數撥足以濟支放另於該年奏銷冊內詳細造報仍令災緩各州縣按限帶徵完欵該部知道欽此

附奏運鉛人員請借銀兩片子

再前准部咨運鉛人員實因遭風沉溺等事請借銀兩必當查勘確實核計水深丈尺分別

奏明酌借所借之數不得浮於應銷之數其應借之銀須俟事竣方准請借等因在案茲有貴州委員天柱縣知縣許樸領解丁未年上運二起京鉛行抵邳州境內滙澤間第七號鉛船一隻被浪觸壞沉溺鉛十萬八百斤雇人撈獲另載計水深三丈

二尺每百斤准銷銀三錢四分共應銷銀三百四十二兩七錢二分照例移請於州庫內動借銀三百四十一兩六錢領回散給又貴州委員修文縣知縣英達領解戊申年下運一起京鉛行抵清河縣境內因隨漕渡黃第八號鉛船一隻遇風打斷錨纜沉溺鉛四萬一千二百斤雇人撈獲另載計水深四丈以外每百斤准銷撈費銀四錢四分共應銷銀一百八十一兩二錢八分稟經署江甯布

政使積喇明阿查明該二員撈獲鉛斤應銷銀數  
有減無浮核與部定章程相符詳請借給前來臣  
覆核無異除批飭在於司庫道光二十七年雜稅  
款內按數分別借給還款具領催運前進並咨照  
省在於該員等應得養廉及報銷應找銀內扣繳  
造報江省作正開銷暨咨部外查該員等運鉛船  
隻早經駛出江省地界趨行前進謹附片具

奏伏乞

聖鑒謹

奏

硃批戶部知道欽此

保送堪勝水師總兵人員摺子

奏爲遵

旨遴選堪勝水師總兵之副將恭摺奏祈

聖鑒事竊准兵部咨欽奉

上諭現在記名應用水師總兵人員將次用竣著兩江  
閩浙兩廣總督各於水師副將內遴選堪勝總兵者  
保奏數員送部引見候朕記名以備簡用不得以無  
員可保一奏塞責等因欽此伏思總兵係專閫大員



水師尤人材難得臣所轄三省惟江蘇有京口太湖內河水師副將二缺內京口協副將武迎吉甫經越級升署尙未給咨赴部引

見其太湖協副將顧清連年五十七歲江南如臯縣人由武舉人拔補外海水師千總游歷川沙營參將升署今職道光二十五年四月引

見奉

旨准升七月到任二十七年正月接劄實授前奉

諭旨遴選堪勝水師總兵經前任各督臣以該員於外  
海風濤尙須歷練奏蒙

聖鑒在案本年

奏派督護海運漕船前赴天津交兌無誤該員老成  
樸實不畏風濤歷俸一年有餘營務均能整飭於  
水師總兵亦堪勝任相應據實奏明俟

命下之日卽行給咨赴部引

見恭候

李文恭公奏議

卷十八

江督

夏七

欽定謹繕摺具

奏伏乞

皇上聖鑒訓示謹

奏 道光二十八年九月初七日具

奏奉

硃批著送部引見該部知道欽此

議請將捕盜水勇挑補弁兵摺子

奏爲江蘇捕盜水勇漸著成效議請挑補弁兵恭摺  
具

奏仰祈

聖鑒事竊臣等前因江蘇水師止論弓馬不習水務節  
經設法整頓始能奮勉出洋而於追補盜船仍未  
十分得力故雖屢有斬獲難期一律肅清復飭代  
理蘇松太道吳健彰現任蘇松太道麟桂督飭前

任上海同知沈炳垣上海縣知縣藍蔚雯採訪輿論體察機宜並因安徽蕪湖縣知縣林德泉籍隸廣東頗知水務調至江蘇籌辦務令舟師日有起色一面勸諭紳富捐雇水勇船隻董以文員隨同剿捕卽據水勇頭目周鰲周永清等會同巡洋營員三次生擒盜匪四十二名擊殺盜匪十一名擊沉盜船二隻拏獲大盜船二隻小船一隻救回被劫商船九隻被擄難民二十六名均經臣等先後

奏明在案茲又據上海縣稟報水勇頭目胡維榮於  
八月二十三日隨同兵船在洋遇見盜船四隻行  
劫沙船當卽駛攏救護擊沉盜船二隻有大盜船  
一隻竟敢開礮拒捕胡維榮首先趁勢過船各兵  
勇亦接踵而上生擒盜匪七名割取首級七顆餘  
皆落海淹斃起獲擡槍五桿烏槍二桿小礮一門  
刀械八件救出被擄難民十一名除批飭將現獲  
盜犯提省審辦並嚴札輪巡外洋之福山鎮總兵

孫雲鴻督率兵勇乘此聲威同心協力一鼓作氣  
以靖洋面臣等伏查水師官兵近日頗知激勵又  
有水勇助勢彼此踴躍爭先而水勇雇由紳商多  
係沿海漁戶水手來歷尙易稽查並舉有身家頂  
帶者作爲頭目管領既非烏合無籍之徒亦無易  
聚難散之弊是以二十日內四次擊船獲盜悉遵  
指麾約束其中儘有可造之材以之挑補弁兵巡  
洋足資驅策雖不盡諳騎射核與成例未符惟念

國家立賢無方水師人才難得合無仰懇

天恩俯准

臣

等於現在出力水勇內擇其材堪任使著

有勞績者隨時拔入水師如外委額外兵丁卽由  
臣等酌拔咨部把總以上請

旨遵行仍令於入營後學習騎射以符定制俾各水勇  
咸思上進莫不勤奮圖功卽本營各弁兵愧憤交  
深自當勉益加勉或可習成勁旅壁壘一新上副

聖主整飭水師之至意再前據蘇松鎮等議請仿造廣



東艇船數隻出洋捕盜臣等恐駕駛不合

奏明先雇試用茲查數次在洋接仗均得艇船之力  
擬卽札飭鎮道再加詳察或買現成船隻或依粵  
式製造均歸籌捐戰船案內辦理合併陳明謹會  
同江南提督臣尤渤合詞恭摺具

奏伏乞

皇上聖鑒訓示謹

奏 道光二十八年九月初七日具

奏奉

硃批軍機大臣會同該部議奏欽此

附奏淮商捐穀助賑片子

再本年江北水災既重且廣先經分飭勸捐收養  
並委員勘辦撫卹節次

奏明在案查揚州府屬地居下游情形尤爲喫重現  
距冬賑尙遠卽來春接濟亦須先事預籌庶

帑項不致多糜而窮黎無虞失所茲據兩淮鹽運使  
但明倫詳稱淮南鹽商呈請公捐穀一十萬石先  
於鹽義倉存穀內動撥願照新穀市價合成銀數

按引帶完買補還倉等情並據揚州府將前項捐  
穀酌派江都儀徵二縣各領二萬石甘泉高郵寶  
應興化泰州東臺六州縣各領一萬石具報前來  
臣查鹽義倉穀現貯三十餘萬石原爲備荒而設  
當此下河被水田廬涸復需時貧民待哺方切嗟  
商共敦任卹捐助情殷自應准其借動穀十萬石  
分撥災區備放除飭運司迅速照數發給責成揚  
州府督同印委各員認真妥辦務期倉糈顆粒實

惠均霑不准稍滋侵冒仍將借動穀石歸各商帶  
完買補外所有淮南鹽商捐穀助賑緣由謹會同  
江蘇巡撫臣陸建瀛合詞附片具

奏伏乞

聖鑒謹

奏

硃批依議戶部知道欽此

附奏覆陳夷商貿易情形片子

再<sub>臣</sub>等承准軍機大臣字寄道光二十八年八月二十日奉

上諭李星沅等奏哦囉嘶商船請在上海貿易已飭開導回帆一摺覽奏已悉以後該國商船如果再來曉瀆該督等惟當循照舊章以理阻卻斷勿令其時存覬覦致啟效尤之漸至此次哦囉嘶來稟旣由暎夷領事轉送將來難保不互相勾串以該國貨物附入

嘆商影射貿易此亦夷情詭譎之常不值與之較論  
嗣後倘哦囉嘶人與船隻俱不入口其貨物竟歸入  
暎夷售賣彼此俱未明言似不必說破以全大局而  
示優容諒嘆夷亦不肯出此也等因欽此仰見我

皇上洞矚無遺周詳指示臣等無任欽服伏查哦囉嘶

商船已於八月十三日乘風放洋南去業經臣等

會摺

奏報在案惟此次來稟既由嘆夷代遞詢之咪拂諸

夷又皆稔悉其詳誠難保不互相勾串影射貿易  
嘆夷果自爲計則亦不肯出此似將來辦法總以  
哦囉嘶人船俱不入口報稅爲準其他無足深究  
至於夷類相近夷性靡常或偶作疑難自當持以  
不驚或希圖小利亦可置之不校如所爭在文貌  
無妨姑予以示優容倘所患在忽微無稍曲從以  
昭限制臣等惟有欽遵

慈諭隨時相機妥辦務全大局而守定章謹附片覆陳



伏乞

聖鑒謹

奏

硃批所見是欽此

甄別知縣摺子

奏爲查明才不稱職及人地未宜之知縣請

旨分別降補撤任以肅吏治恭摺奏祈

聖鑒事竊思知縣爲親民之官必須才力周到施措合  
宜至地方偶遇偏災尤關民生利害務以經理得  
人爲亟臣等督同司道於各屬隨時甄劾確切訪  
查茲有高淳縣知縣阿勒寄瀆滿洲舉人選補今  
職才具本屬中等近復遇事寬緩不能振作有爲

寶應縣知縣董式謨直隸舉人截取選用人尙老  
實小心而拘謹性成精神亦虞竭蹶該二縣正值  
水災賑務殷繁殊難望其整理卽久膺民社亦於  
地方無裨相應請

旨將高瀆縣知縣阿勒寄瀆寶應縣知縣董式謨均降  
爲府經歷縣丞畱於江蘇補用仍飭查該員等經  
手錢糧有無虧短照例辦理所遺高瀆寶應兩縣  
均係選缺本省現有應補人員容再遴員請補又

甘泉縣知縣徐德元安徽附貢年力方壯辦事頗  
勤惟輕重緩急之間權衡鮮當人地未甚相宜一  
併請

旨撤任畱省察看不敢稍涉遷就謹合詞據實陳

奏伏乞

皇上聖鑒訓示謹

奏 道光二十八年九月初七日具

奏表

硃批另有旨欽此於高淳寶應甘泉三處句旁均奉

硃點內閣奉

上諭李星沅等奏請將才不稱職及人地未宜之知縣  
分別降補撤任一摺江蘇高淳縣知縣阿勒寄溇遇  
事實緩不能振作有爲寶應縣知縣董式謨拘謹性  
成精神亦虞竭蹶均著降爲府經歷縣丞畱於江蘇  
補用甘泉縣知縣徐德元人地不甚相宜著撤任畱  
省察看仍飭查各該員經手錢糧有無虧短照例辦

理該部知道欽此

奏謝兼署南河總督摺子

奏爲遵

旨兼署南河督篆恭摺奏謝

天恩事竊臣准吏部咨開道光二十八年九月初四日

奉

上諭江南河道總督著楊以增補授未到任以前著李  
星沅兼理等因欽此祇悉之下悚感彌深查江省賑  
務方殷刻難延緩各屬災民撫卹甫經次第放竣

其災重應賑之區現經撫臣陸建瀛親勘亟望水  
勢消落印委覆查戶口並諭外出窮黎一律歸賑  
核實散給近因奈山洋面時有盜艇咨商提臣尤  
渤督飭鎮將追剿一面添雇民船配載兵勇迅速  
扼要截擊正在分別籌辦欽奉前因幸河工大局  
已定霜清在卽可保安瀾惟當查明庫項以濟要  
需催齊撥項以供歲料前啟湖河各壩均須上緊  
堵合蓄堤內之水預備空重漕運疏堤外之水早



期涸復民田一切應辦事宜勉力悉心經理上紓  
宸注不敢以暫時兼署稍懈修防臣擬卽日起程前赴  
清江接受河督印務再行酌量回省所有本衙門  
循例文件仍暫委署藩司積喇明阿代拆代行合  
併陳明謹繕摺具

奏恭謝

天恩伏乞

皇上聖鑒謹

奏 道光二十八年九月十六日具

奏奉

硃批知道了欽此

揀員請升蘇松鎮標左營游擊摺子

奏爲揀員請升外海水師遊擊守備恭摺奏祈

聖鑒事竊照蘇松鎮標左營遊擊吳聯魁革職又該營  
守備黃登第升任所遺遊擊守備各缺均係外海  
水師題補之缺駐劄崇明縣地方接准部咨指用  
應題人員例應於隔府別營並無事故人員內遴  
選請補查江蘇額設外海都司三員內掘港營都

司陳施華業已

題准升署福山鎮標左營遊擊如蘇松鎮標都司施  
元敏南匯營都司張鳳翔均有疏防案件是都司  
內無合例可升之員例准於守備內越缺升補所  
有額設外海守備八員除疏防事故各員外其較  
爲合例者非缺居緊要卽人地未宜查有川沙營  
守備毛正和年三十八歲崇明縣人由原設蘇松  
鎮標奇營兵丁出身洊升今職道光二十七年八  
月到任二十八年二月追剿洋盜圍擊擄逢盜船

生擒盜犯五名緝捕奮勇該員年力強壯鎗礮熟嫻歷俸已滿一年現經委署是缺辦理裕如以之請補蘇松鎮標左營遊擊實堪勝任又外海各干總內現無合例應升之員查有福山鎮標左營千總龔成良年三十二歲崇明縣人由蘇松鎮標右營兵丁出身游拔今職道光二十六年閏五月受劄二十八年二月隨同追剿洋盜圍擊撐篷盜船生擒盜犯在事出力該員年壯操勤熟習鎗礮歷

俸已滿一年前署該營守備疏防事王馮仁瑞被劫等案業於疏防限內卸署撤巡例應照離任官議結無礙升轉以之請補蘇松鎮標左營守備亦堪勝任惟該二員均籍隸本州按例自應迴避伏查江蘇外海水師人員籍隸松江太倉通州三處居多而太倉州之崇明縣籍貫尤衆亦惟崇明縣人尙堪造就因駐劄崇明共有武職六員向遇升調每多迴避本籍致將隔府別營人員循例揀補

實於水務無益且查中樞政考內載廣東省內河水師守備缺出准於籍隸本府人員內題請升補等語又水師提督總兵向不迴避本營本籍蓋以水師責任重在海防原與陸路不同是以均邀

特恩量材授任今蘇松鎮標左營遊擊守備二缺既無合例堪補之員與其拘泥成例遷就無裨莫若援照變通得人有用可否仰懇

聖恩俯准將守備毛正和越缺升補蘇松鎮標左營遊

擊千總龔成良升補蘇松鎮標左營守備毋庸廻  
避本籍之處恭候

欽定如蒙

俞允另行給咨送部引

見除查取履歷咨移部科外謹會同江南提督臣允渤

合詞恭摺具

奏伏乞

皇上聖鑒訓示謹



奏 道光二十八年九月十六日具

奏奉

硃批兵部議奏欽此

酌擬移駐江陰官兵摺子

奏爲江陰地處扼要酌擬移駐官兵恭摺奏祈

聖鑒事竊臣於上年周歷江防綜度全局形勢以京口

副將駐劄之江陰縣地要兵單議請將高資營官兵移駐江陰附片

奏明在案惟事關更改舊制必當詳咨博訪詢謀僉同當飭蘇州藩司京口副將常州府營先後委員勘明議覆前來臣查江陰縣城外之鷺鼻嘴實爲

長江第一重門戶亟宜先籌守禦現在京口副將及左營守備雖卽駐劄城內計所轄其十三弁兵丁五百四十九名除分防南岸汎地並大小石灣礮堤之外存營兵數無多其左營遊擊帶兵三百五十四名旣遠駐江北靖江縣而同城之陸路江陰營又止兵丁二百六十八名僅敷防緝腹裡汎地之用設有緩急徵調維艱是京口副將統轄沿江南北兩岸四營而本標實無親兵自應酌量變

通俾免臨事掣肘至高資營原設都司千總把總各一員外委額外七弁兵丁五百四十名駐劄丹徒縣之高資港從前濱臨大江上援省城下應鎮江地勢頗爲扼要近來沙洲疊漲高資港已在便民河之內安處腹裡並無分防汛地今昔情形迥乎不同應請將高資營都司移駐北岸靖江縣作爲京口協標左營都司管轄原設京口左營北岸千總一員把總二員外委三員兵三百五十四名

汛防二十三處再於南岸撥出額外四名兵四十  
六名共四百名一併歸左營都司管轄此項移撥  
兵丁應俟南岸出有糧缺歸於北岸陸續招補以  
免遷駐之煩其原駐靖江縣之京口左營遊擊移  
駐江陰作爲京口協標中營遊擊管轄南岸江陰  
縣原設左營守備一員千總一員把總二員外委  
三員撥存額外三名兵五百三名汛防十九處再  
於原設高資營內撥出把總一員外委二員額外

三名兵四百名移駐江陰一併歸於中營遊擊管轄所有員缺營制弁委汛地均仍其舊尙存原設高資營千總一員額外二名兵一百四十名仍駐高資港作爲高資汛千總歸於京口右營遊擊管轄差操至大小石灣礮堤仍由副將督率中營遊擊守備弁兵操演其北岸劉聞沙礮堤卽令左營都司統領操演以專責成高資營尙有春秋兩季在於金山黃天蕩水操伺應將軍副都統較閱並

圖山關礮堤接應後路事宜查金山水操向係京  
口左右高資三營配搭八旗官兵合操屆時仍循  
其舊其黃天蕩水操係高資營預備今既分別移  
駐勢難遠道伺閱應請停止至圖山關礮堤後路  
就近改撥常州孟河兩營兵丁二百名由孟河營  
都司管帶前往伺應操演移駐各兵情願隨營移  
徙者循案添建兵房安土重遷者准其告退作爲  
附近各營餘丁遇缺挑補凡有退缺兵額卽在江

陰募充應建衙署庫局兵房現飭擇地勘估所需  
經費卽在善後餘剩銀兩內撥用彙案奏報毋庸  
另籌其應行改鑄關防及一切未盡事宜再行分  
別

題咨辦理如此量爲轉移庶原設之高資營不致虛  
糜俸餉而江陰扼要地方足資控制江防旣昭嚴  
密營制亦無窒礙是否有當謹會同江甯京口將

軍臣裕瑞江蘇巡撫臣陸建瀛江南提督臣尤渤



合詞恭摺具

奏伏乞

皇上聖鑒訓示謹

奏 道光二十八年九月十六日具

奏奉

硃批兵部議奏欽此

附奏辦漕交涉弊端毋須聯銜具奏片子

再江蘇辦漕浮費甫經撫臣查開數目並酌擬條

款會摺具

奏旋准戶部行令會同漕督倉場聯銜具奏等因臣

竊惟浮費之起始由有漕各州縣漫不加察委任  
了胥賂削民膏飽充私橐甚至官爲役用亦思歲  
取盈餘於是漕稱利藪弊端百出其先幫船之弁  
丁其次閘壩之夫役通倉之經紀舍人遞索規費

漸增漸浮至於此極故變本加厲之害實皆州縣  
作俑致以幫費啟紛爭而截流清源之方又必幫  
費從輕乃爲州縣資搏節凡論江蘇漕政均自裁  
減幫費始然一減於前撫臣岳起再減於前督臣

孫玉庭非不斟酌曲當究之費且日增轉視奏明  
數目以爲分所應得卽上年署撫臣程喬采漕臣

楊殿邦會奏大加裁減仍未見有實濟書所謂非  
知之艱行之維艱也試以收漕論官與民相持花

戶略爲觀望而漕誤矣以兌漕論縣與幫相持弁  
丁故爲渙散而漕誤矣又或漕行限迫必參州縣  
以遲延地方累深必指漕幫爲排斥此不待過淮  
抵壩而已各執一詞均非無見蓋督責愈急則弊  
愈生指陳愈繁則弊愈雜多一防弊之法卽多一  
索費之門此時蘇漕重困有未敢縷述者今有人  
病在膏肓形同痿痺積日累月寸步爲難卽令和  
緩醫調尙未必無他慮若加攻伐之劑遽求旦夕

之功診候各殊紛如聚訟始則以藥治病繼且以藥治藥勢將動觸危機不可救藥而後已漕務之弊與此略同臣目擊情形杞憂倍切事關

國家大計稍一不慎決裂滋虞惟當防於未然去其太甚誠如戶部議

奏經理漕政事本相因其中交涉弊端則以各清各弊爲主似無須再議聯銜可否請

旨飭下有漕各督撫及漕督倉場衙門務各屏除成見

共矢同心勉圖整頓之宜嚴絕推諉之習庶幾人  
和感召年穀順成仰副我

皇上愛民裕漕之至意謹附片密陳伏乞

聖鑒謹

奏

硃批戶部議奏欽此

恭報兼署南河總督日期並陳河工情形摺子

奏爲恭報微臣兼署河督日期並河工現在情形據

實陳

奏仰祈

聖鑒事竊臣於本年九月十四日奉

旨兼署南河總督當經奏謝

天恩卽於十八日起程二十四日行抵清江受篆任事

節臨霜降普慶安瀾回空軍船已有六幫入境飭

速迎提催僨大局均尙順平惟河庫出納攸關經  
臣疊飭該道分別緩急慎重支放並於八月到浦  
時面屬再三茲據該道法良單呈實存正雜各款  
截至九月二十二日其止銀四萬六千餘兩現在  
堵壩需費各廳領款尙多又值歲料例銀半須候  
部改撥庫項空絀至此不敢不備陳其難瑣瀆

聖聽查本年湖河各壩全數啟放惟林家西壩及智信  
禮河壩業已次第堵築仁河較高無庸再堵其餘



車南中新昭關等壩均須備料堵合而義河壩工費尤繁道光二十三年計用銀二十餘萬兩彼時外越興工湖水已落至一丈一尺此次情形小異再需時日卽恐水勢過洩來年重運維艱前河

臣

潘錫恩議候湖水一丈三尺卽須上緊儼辦所需工用尙多且水較深則費較鉅雖飭極力撙節而度支不敷道廳無從措手此堵義河之難也又河工歲料例須早發銀兩年內購足前五分新年必

應購齊稟候河臣查驗實爲春工急務此次例撥

銀一百二十萬兩內有江蘇安徽請留辦賑銀六

十七萬二千兩並江西秋撥地丁銀十二萬兩亦

恐留作賑費近省改撥萬難遠省俟奉文委解天

寒暑短抵浦必不能早各廳請辦歲料河庫無以

應之此發歲料之難也至河庫歷年用款多者四

五百萬少亦三百餘萬本年除例撥等款外領辦

土工銀十五萬兩添撥工需銀五十萬兩均已動

用無餘卽現存銀四萬餘兩尙係減平應解之款  
此外請領未發銀仍有六十餘萬兩例應於到任  
後盤查核計惟庫款前後膠轕其中應領應銷合  
之二十三廳官非一任事非一時斷非兩三月所  
能清理臣素昧推算河務尤非所能既未敢稍任  
虛糜復未能遽窮實際此查庫款之難也臣職本  
兼轄重以奉

命兼署責無可辭謹當竭力維持節慎籌辦務除積習

勉效愚誠惟災賑亟宜究心巡洋方資策遣礮堤  
泖湖各路尙須親歷詳查清江遠處一隅誠恐顧  
此失彼撫時循分惕勵交深新任河臣楊以增計  
日入都

陛見合無籲懇

鴻慈飭速赴任俾得各專職守感戴

生成更無旣極所有

微臣

兼署河督日期並河工現在

情形謹繕摺具

奏伏乞

皇上聖鑒再前河臣潘錫恩於卸篆後交到奏摺一件

敬謹代呈

御覽合併陳明謹

奏 道光二十八年九月二十五日具

奏奉

硃批知道了欽此

升任道員現署藩司擬請暫緩交卸摺子

奏爲江南升任道員現署藩司篆務擬請暫緩交卸  
起程恭摺奏祈

聖鑒事竊江甯鹽巡道積喇明阿欽奉

諭旨升任福建臬司當經恭錄轉行應卽欽遵交卸迎  
摺北上惟查積喇明阿先經<sub>臣</sub>等

奏委署理江甯藩司各屬被水之區均飭親往履勘  
確查印委撫卹紳富捐資一面核定災分約計銀

數詳請奏明

賜賑務俾實惠及民該司服官江南歷年既久情形最  
爲熟練值茲賑務方亟若一時遽易生手誠恐展  
轉接卸或致頭緒絲棼相應籲懇

天恩准將升任福建臬司積喇明阿畱署江甯藩篆仍  
飭督辦災賑倍加詳慎俟新任藩司馮德馨到省  
再行交卸起程理合會摺具

奏伏乞

皇上聖鑒訓示謹

奏 道光二十八年九月二十五日具

奏奉

硃批依議欽此



揀員請升掘港營都司摺子

奏爲揀員請升外海水師都司恭摺奏祈

聖鑒事竊照掘港營都司陳施華升署福山鎮標左營  
遊擊所遺掘港營都司係外海水師題補之缺駐  
劄如臯縣地方例應於隔府別營並無事故人員  
內遴選請補江蘇省額設外海守備八員內狼山  
鎮標右營守備李延舉由山東千總掣補到任未  
久尙須察看其餘各員均有疏防案件惟查有蘇

松鎮標中營守備陳其恕年二十八歲淮安府清河縣人原籍安徽泗州由蘇松鎮標右營兵丁出身游拔千總

題請升署今職於道光二十八年正月到任八月奉部覆准該員年壯技嫻練習槍礮前曾擊斃夷匪歷獲私鹽船犯本年委帶兵船護送海運米船至山東交替無誤以之請升都司實堪勝任其所歷千總俸已滿一年例應實授守備惟於升補案內

尙未赴部接劄與例稍有未符伏查前有掘港營都司員缺因無合例人員先後請以未經引

見接劄實授之南匯營守備張鴻亮福山鎮標左營守備陳施華升署均蒙

恩准有案今陳其恕事同一例合無仰懇

聖恩俯准將守備陳其恕升署掘港營都司實於水師營伍地方有神如蒙

俞允另行併案給咨送部引

見恭候

欽定仍俟扣滿守備歷俸照例另請實授除飭取履歷  
咨移部科外謹會同江南提督臣尤渤合詞恭摺  
具

奏伏乞

皇上聖鑒訓示謹

奏 道光二十八年九月二十五日具

奏奉

硃批兵部議奏欽此

李文恭公奏議

卷十八

江督

學

附奏借款購備河工歲料片子

再奉撥河工歲料銀一百二十萬兩向係近省先  
解冬間卽發各廳依限購備現在改撥過半近省  
又無可籌遠省解銀到工深慮緩不濟急臣查淮  
北票鹽局前因票商情願併納戊申一綱稅課銀  
八十九萬四千餘兩

奏明存貯運庫留至該綱奏銷分別報撥茲值歲料  
喫緊應請於此項正課內就近先行動借銀三十

萬兩以供亟需一俟河餉解到卽飭照數歸還於  
帑項並無出入理合附片陳

奏伏乞

聖鑒訓示謹

奏

硃批另有旨欽此內閣奉

上諭李星沅奏購備河工歲料請先借款等語南河歲  
料銀兩向係近省撥解現在改撥過半遠省撥解需

時緩不濟急著准其於運庫存貯淮北票商稅課款  
內先行動借銀三十萬兩以供亟需一俟河餉解到  
卽著如數歸款毋許延宕該部知道欽此



奏報霜降安瀾摺子

奏爲節交霜降河湖各工修防平穩普慶安瀾恭摺  
循例由四百里具

奏仰慰

聖懷事竊照本年自清明節起至寒露節止河湖水勢  
工程情形經臣及前河臣潘錫恩隨時奏

聞在案綜核黃河來源甘肅甯夏府長水二次河南陝  
州萬錦灘長水十次武陟縣沁河長水十六次鞏

縣洛河長水一次共二十九次長水六丈七尺五寸屢值伏汎大雨報長甚勤兩岸各廳或無工處所塌灘裡卧或淤閉舊埽被溜刷出其餘臨黃埽壩此鑲彼墊情形已屬喫緊迨七月下旬沁黃洛河同時並漲盆形湧驟外南廳順黃壩誌椿積存至四丈三尺三寸比上年秋汎盛漲尙大三寸比二十五六兩年計大三尺三寸及六尺一寸不等徐屬一帶節據各廳稟報河流出槽漫灘險工疊

出經臣與前河臣潘錫恩先期通飭該管道將督

率廳管豫爲籌備錢糧料物均尙應手並派在工  
學習之刑部員外郎張道進工部主事郭禮圖及  
候補員弁協同防守晝夜巡護而徐州以上之十  
八里屯滾壩到誌卽啟藉資分減得以化險爲平

茲交霜降順黃壩誌椿存水三丈七尺二寸十八  
里屯滾壩業經興堵各工一律穩定洪澤湖水四

月初旬卽已報長亟籌分減先將山盱仁禮二河

智信二壩次第啟放詎交夏至以後淮源增旺拍岸盈堤臨湖石工間被風掣其完整段落亦節節入水僅恃子堰攔禦所有林家西壩及義河二處雖係減漲之區向來未敢輕啟據前河臣潘錫恩函商湖堤爲淮揚保障關係甚重不敢拘泥卽於七月初三日啟放林家西壩仍覺消不敵長高堰誌椿積存水二丈一尺四寸比上年盛漲大至五尺七寸堰盱及運口各工岌岌可危清江淮安等

處居民惶惑紛紛遷避不得已接啟義河水始見  
消至淮揚運河承受洪澤湖水歸江壩河雖經先  
啟無如江潮頂托六月中旬將歸海之車南中新  
四壩以次遞啟而落水數寸之後仍復增長高郵  
誌椿積存至一丈七尺二寸水勢之大實從來所  
未有竇應以下西堤大半入水湖河通連東岸一  
線單堤捍禦全湖巨浪高處僅出水尺許堤後又  
多積潦兩面浸泡潰塌滲水處多較堰盱尤爲著

重前河臣潘錫恩與臣先後赴工查勘酌示修守  
機宜責成該管文武實力保護仰賴

聖主鴻福

神祇默佑偶起西風均不甚从人力尙可施展而印  
委各員亦皆深知奮勉設法購運料物不避風雨  
艱難分投搶辦嗣又將揚運廳屬昭關壩啟放水  
勢消動得保無虞臣等欣慶之餘益增凜惕茲查  
洪湖誌椿存水一丈四尺二寸高郵誌椿存水一

丈一尺五寸比前次盛漲時已落七尺餘寸及五尺餘寸不等已將山盱林家西壩智信二壩次第堵合禮河亦在堵築卽日可竣仁河向不堵閉惟義河跌塘過甚必須越入湖心圈築辦理較爲費手業經酌發錢糧先飭購料俟水再稍落卽行核定用款督催僱辦其下游高郵四壩及昭關壩亦飭豫購料物相機酌堵均不稍任延誤其邳宿運河夏間山泉疊漲亦甚湧驟因秋深源弱將各閘

壩水口上緊堵築蓄水濟運茲據報回空首幫大河前幫船隻於九月十二日入江南境臣惟有督飭所屬認真催提一俟挽抵楊家莊積有成數卽行啟壩渡黃其南岸塘河因本年灌放重運黃流裡進以致淤墊現在趕緊挑挖務令刻日完工其餘一切事宜亦經妥爲籌備船行可期順利堪以仰慰

宸懷所有節交霜降普慶安瀾緣由謹恭摺循例由四



百里具

奏至本年淮黃異漲屢遭奇險實賴厚策厚力得以  
保護平穩在事文武員弁著有微勞可否擇其尤  
爲出力者酌加獎勵出自

天恩伏乞

皇上聖鑒訓示再兩江總督係臣本任毋庸會銜合併  
陳明謹

奏 道光二十八年九月二十七日具

奏奉

硃批欽感欣幸覽之另有旨欽此內閣奉

上諭李星沅奏霜降安瀾一摺本年黃河來源甚旺兼  
之伏汎大雨河湖同時並漲有長無消奇險疊出幸  
賴設法啟壩疏濬該文武員弁等奮力搶護化險爲  
平現在節交霜降各工一律平穩此皆仰賴

河神默佑普慶安瀾覽奏之餘欣幸欽感著發大藏香  
十炷交李星沅虔詣

河神廟代朕敬謹祀謝用答

神庥潘錫恩業經開缺李星沅著加恩交部議叙在事  
出力文武員弁著李星沅擇其尤爲出力者酌保數  
員候朕施恩毋許冒濫欽此

附奏請

加封風神片子

再本年洪湖異漲堰旰二廳臨湖石工大半入水  
僅恃土堰攔禦下游高寶一帶西堤漫入水中東  
岸單堤時有平漫之勢雖晝夜分投搶護而工段  
緜長險非一處設遇西北大風則將無可措手乃  
經歷兩月餘有時或西或北風暴偶作不數刻旋  
轉東南故於極險之時猶得勉竭人力保護平穩

此實仰賴

聖主誠敬感孚

風神默佑所致凡屬官弁軍民莫不同聲歡頌恭查  
河口及堰圩等處崇祀

風神於雍正年間

敕封清和宣惠風伯之神道光十一年蒙

加封康濟二字合無仰懇

天恩再賜

敕加封號以答

神庥而昭祈報之處伏候

聖裁合併附片具

奏請

旨謹

奏

硃批另有旨欽此內閣奉

上諭李星沅奏濱湖

李文恭公奏議

卷十八

工部

七

風神丕昭靈應請加封號等語著禮部議奏欽此